

九曜齋筆記卷一

三老

前書高祖紀二年舉民間年五十以上有修行能帥眾為善置以  
為三老鄉一人擇鄉三老一人為孫縣三老與孫縣令丞尉以事相教  
復勿繇戍以十月賜酒肉 後漢百官志曰三老掌教化凡有孝  
子順孫貞女義婦讓財救惠及學士為民法武者皆扁表其門以  
興善行 續漢書禮儀志注孝經援神契曰尊三老者父象也謁  
者奉几安車輓輪供綏執事五更寵以度德接禮交客謙恭順親  
宋均曰三老老人知天地人事者奉几授三老也安車坐來之車  
輓輪蒲裏輪供綏三老就車天子親執綏授之也五更老人知五  
行更代之事者度法也度以寵異之也應劭漢官儀曰三老五更  
三代所尊也安車輓輪送迎至家天子獨拜于屏三者道成於天

東吳惠棟定字



地人老者久也舊也五者訓于五品更在者五世長子更更相代言其能以善道改更己也三老五更皆取有首妻男女完具臣昭案桓榮五更後除兄子二人補四百石則榮非長子矣蔡邕曰五更長老之稱也禮儀志曰養三老五更之儀也先吉日司徒上太傅若講師故三公人名用其德行年者高在者一人為老次一人為更也盧植禮記注曰選三老者為三老鄉大夫中之老為五更亦參五之也皆服都紵大袍單衣早緣袖中衣冠進賢扶玉杖五更亦如之不杖皆齊于大學講堂章句曰三老國老也五更庶老也其日乘輿先到辟雍禮殿御坐東廂遣使者安車迎三老五更天子迎于門屏交禮道自阼階三老并自賓階至禪階天子揖如禮三老升東面三公設几九卿正履天子親袒割牲親執醬而饋執爵而酌祝鯁在前祝噎在後五更南面公進供禮亦如之明日皆詣闕謝恩以見禮遇大尊顯故也譙周五徑然

### 饗禮

否曰漢初或云三老答天子拜遭王莽之亂法度殘闕漢中興定禮儀羣臣欲令三老答拜城門校尉董鈞駁曰養三老所以教事父之道也若答拜是使天子答子拜也詔從鈞議譙周論之曰禮尸服上服猶以非親之故答子拜士見異國君亦答拜是皆不得視猶子也虞喜曰且據漢儀于門屏交禮交禮即答拜中興謬從鈞議後革之深得其意

### 頻煩

說文曰饗鄉人飲酒也家君曰鄉人飲酒謂之饗然則鄉飲酒即古饗之禮先儒謂饗禮已亡非也

漢書曰非皇天所以鄭重降符瑞之意師古曰鄭重謂頻煩也杜詩云三顧頻煩天下計亦謂鄭重之意或以頻煩為頻數之頻古

無是訓近俗有之

說文

說文所引諸說上自孔子下及兩漢共二十八人孔子說莊王說韓非說左氏說淮南王說司馬相如說董仲舒說衛宏說楊雄說京房說劉歆說杜林說賈侍中說桑欽說傅毅說官溥說譚長說王育說尹彤說張林說黃顛說周盛說逯安說歐陽奮說寧嚴說爰禮說徐巡說莊都說張徹說賈侍中者賈逵也許慎從逵受古學故舉其官名

借倩之倩

陸放翁言昭德諸晁謂壻為借倩之倩近世方訛為倩貯之倩予幼小不能扣所出至今悔之案方言云東齊之間輦謂之倩郭氏注云言可借倩也放翁豈未之見耶

輦酌宮

姚令威曰宇文修有一古鼎款識云輦酌宮案輦酌漢書作蓮文酌音蓮酌音蓮縣名在櫟陽去長安七十餘里漢書及黃圖舊事宮閣名諸書皆不云蓮音蓮有宮博物如歐劉皆不能祥詳鍾鼎款識載劉原文所藏蓮音蓮勻音蓮鑪銘云蓮音蓮勻音蓮宣銅一斗鼎下縣重四斤十兩五鳳三年五月己丑上音滑謂成徐安守屬定昌造此又一蓮音蓮勻音蓮宣鑪也並載之以俟博雅

大尚書

隋書經籍志正論六卷四人月令一卷漢大尚書崔寔撰案東漢有尚書令僕丞郎不稱大尚書漢劉寬碑陰有大尚書河南張祗字子戒又山陽太守祝睦碑云解音解司空府北軍中候拜大尚書僕射洪适隸續曰以其長于諸曹故加大以別之

三商

漢冊禮鑑銘曰吾作明鏡幽鍊三商周列典祀配像萬彊徐獻忠曰古之冶鏡取金氣盛而鍊之以三載或三月以周易乾坤五五之數故曰三商余按士昏禮鄭目錄曰必以昏者陽往而陰來日入三商為昏賈公彥曰商是商量漏刻之名鑑諸陰類鍊之昏夜故云幽鍊徐氏之說殊不定據 商釋文音嫡鑑銘與彊協則讀為商量之商先王父有句坐聽三商玉漏移或據釋文謂不當讀平聲余據鑑銘以答之或不能難夏文莊蓮漏銘五夜宵三商定夕亦讀平聲蘇子美云三商而眠高春而起則讀為嫡

侍中

相書占氣襟要曰氣如連珠入闕門為侍中

對番

東宮舊事曰守鑰四人對番上下東宮門鑰在中庶子坊

蘭相

費風別碑云司馬慕蘭相南容復白圭

五業

漢替郵斑碑噴噴意五業遂悉包之握樞運棋要道氏是綜五業謂五經也魏畧樂詳少好學五業並授劉表時有五業博士宋哀

更老娶首妻

國三老袁良碑云羣司以君父子俱列三臺老人結髮上為三老案應劭漢官儀三老五更皆取有首妻男女完具則結髮在首妻也 周澤為三老有太常妻華陽國志張霸為五更其妻馬敬司檢前妻子女則知當時有不盡取首妻者矣或格疑霸為五更前妻尚在案霸本傳云當為五更會疾卒明其時有後妻矣獨行傳李

充為國三老充少出妻所未詳也

內艱

南史司馬嵩年十二丁內艱

三命

趙岐孟子注云命有三名行善得善曰受命行善得惡曰遭命行惡得惡曰隨命仲秋下旬碑云三命縮羸嚴訢碑云經說三命君獲其央經說者孝經說也案孝經緯援神契曰命有三科有受命以保慶有遭命以譴暴有隨命以督行受命謂軍籌也遭命謂行善而遇凶也隨命謂隨其善惡而報之鄭康成祭法注云司命主督察三命洪氏跋下旬云三命當選貢也王懋以為即陰陽家五星三命之說皆誤央中也君獲其

扶風

予家出自扶風始祖文林閣學士吉甫公諱元祐尹和靖高弟也少有知人鑑識岳武穆於微賤吉甫公當宋徽欽高三朝以直節聞初以劾朱勔花石綱事忤蔡京削籍歸後扈高宗駕如臨安復忤秦檜以病乞身卜居湖州之大全港聞武穆死不食七日而卒蓋悲二聖之不復若將殉焉者也夫惠子為唐之高士吉甫為宋之名臣而史皆不載惜哉天所崇文林閣學士宋時無此官名譜牒所載未可信

惠氏

廣韻惠姓出瑯琊周惠王之後梁有惠施予案樂史太平寰宇記惠氏有二生望一為瑯琊一為扶風瑯琊者三國志袁術傳云瑯琊是惠衢星也扶風者西京雜記所云長安惠莊是也惠施梁相見莊子惠盎見呂氏春秋戰國人高誘曰惠盎宋人惠施族也惠氏不顯於六朝略見於唐著於宋少陵有送惠二過東溪詩云空如滯斯人又云黃

綺未稱臣又幽人詩云往與惠詢輩中年滄洲期注家以為詢即其名乃盛唐高士也舊注惠荀謂惠昭惠為狂司空圖一鳴集有與惠生書當晚唐時洪氏隸續云晉銅漆盤歎識今在宜興惠公襄家孫仲觀大全集有與惠彦和書數千通彦和亦義興人余家族譜所不載疑瑯琊之裔族譜序稱漢有交州刺史惠乘眾漢書所未載未知何據

顏氏家訓曰孝元嘗遣典籤惠編送文章示蕭祭酒則六朝惠氏有官典籤者矣

### 哀江南賦

哀江南賦云畏南山之雨忽踐秦庭近代注此賦者如吳江葉氏舒崇崑山徐氏炯皆不詳所出余謂此指晉公子重耳也重氏過曹曹共公聞其駢脇欲觀其躒浴句薄而觀之詩序言共公遠

君子而近小人故其時作詩者刺之云彼其之子三百赤芾又云蒼兮蒼兮南山朝濟婉兮變兮季女斯飢其後重耳復國伐曹數之以不用僖負羈遠君子而乘軒者三百人近小乘軒者三百即詩所云三百赤芾是也服虔注左傳亦云重耳出亡自曹而衛而宋而齊而楚楚成王乃送之秦畏南山之雨詩所云南山朝濟是也忽踐秦庭借用申包胥立于秦庭語其實皆重耳一人之事注賦者泥于包胥一事遂令二句為兩義矣賦又云讓東海之濱遂餐周粟南山東海秦庭周粟指南北朝而言乃子山親歷之事也

### 清慎勤

古夫于亭襍錄云清慎勤三字本呂本中居仁官箴語予案已見李東家誠

### 漢張華博物

古夫子亭襟錄云東漢末有議郎張華與蔡邕同以博物著在茂  
先前今人止知茂先著博物志耳右見從伯文至與籠鵝館集惜  
不記出處按漢議郎張華與蔡邕同修漢記又同對災異見邕傳  
注及邕集 蔡中郎集答詔問災異八事云光和元年七月十日  
詔書尺一召議郎張華詣金商門

羅紆

香祖筆記羅紆紆音敷遍檢字書無以紆為敷者未詳所出案漢  
書昌邑王傳山陽太守張敞條奏昌邑王賀居處云臣敞故知執  
金吾嚴延年字長孫女羅紆前為故王妻云云師古曰羅紆其名  
也紆音敷然則紆當作紆故有敷音漁陽偶未照耳

文帝除肉刑

文帝除肉刑而司馬子長下蠶室故孔氏尚書正義賈氏周禮疏  
皆云文帝赦肉刑未赦宮刑 案鼂錯對策曰今陛下寬大愛人  
肉刑不用罪人亡帑又云除去陰刑注張宴曰宮刑也是文帝曾  
赦宮刑後又復設此條猶高后元年除詆言之令文帝二年復除  
詆言之罪皆既除而復設之也

屈茨

外國樂有屈茨琵琶馬貴與不曉屈茨之義文獻案酈元水經注  
引釋氏西域記曰屈茨北二百里有山夜則火光盡日但煙人取  
此山石炭冶此山鍊恒充三十六國用故郭義恭廣志曰龜茲能  
鑄冶龜茲者音屈茨也朱氏箋云漢書有龜茲而西域記有屈茨  
酈君合而詁之謂龜茲即屈茨也又案贊寧物類相感志亦云屈  
茨為龜茲龜茲本音邱茲古讀邱回為區北音讀屈亦為區故龜  
茲訛為屈茨皆聲之轉然則屈茨琵琶即龜茲所造樂器也邱讀

為區見鄭康成檀弓注

憬彼

魯頌憬彼淮夷來獻其琛阮亭釋奠大學詩云聖朝敷文德憬彼  
胥獻琛案丹陽太守郭是碑云檢蠻憬彼用綏海濱乃知句有所  
本

分減

少陵秋野詩盤飧老夫食分減及溪魚武進梁御史曰緝熙曰分  
減二字見華嚴經新城王阮亭長洲注鈍翁兩先生極稱之以為  
注家所未及余按御覽四百二十七卷引東觀漢記曰孔奮薦骨肉  
竒在洛陽每有所食甘美輒分減以遺竒此分減二字所本梁云  
出華嚴經猶為未的東觀漢記與前唐書人稱班東二史乃習  
見之書今亡矣仇氏詳注杜詩云周靖曰華嚴經十布施內有分

減布施此出鈍翁類稿而云周靖非也

咏史小樂府二詩解

阮亭咏史小樂府赦雍齒云太息王髦劍前言殺孔融曾言赦雍  
齒地下愧袁公故友徐君龍友嘗疑此詩誤以文帝殺孔文舉予  
反覆攷之而知詩之引王髦劍者蓋楊脩也曹操妬才嫉能孔融  
楊脩世有大小兒之目而操皆除之詩意謂文帝太息于王髦之  
劍蓋知脩之過薄也而不知操前已無罪殺孔融矣昔袁紹勸操  
楊彪孔融輩操偽以高祖赦雍齒為辭後融見殺而彪幾瀆于死  
卒不免于刑戮脩死才逾百日而操亦卒使死者有知何以見袁  
公于地下乎故云曾言赦雍齒地下愧袁公子脩錢少詹曰操  
二喬曲云腹痛思前事分香惑後工人二喬得佳婿不是洛川神此  
詩言操之狡獪惑溺也操于喬元嘗有知己之感然此特操之狡



猶耳分香望墓田乃其本色耳何以知之以洛川神知之世說言曹公屠鄴令疾召甄左右曰五官中郎以將去公曰今年破賊正為奴季善文選注又言河東王求甄逸女既不遂殊不平是一女而父子兄弟爭之惑溺之甚者也幸而榮瑜不為熙尚故二喬不作洛川神耳設也赤壁之戰東風未便誠有如昔人所云銅雀春深鎖二喬者斯時操與喬公豈復有知己之感耶此詩之意實足誅心

### 魯僖與議

文心雕龍議對篇曰春秋釋宋魯桓務議家君曰案文當云魯僖與議公羊經僖公二十一年釋宋公傳曰執未有言釋之者此其言釋之何公與為爾也公與為爾奈何公與議爾也今注劉勰書者皆不知引

### 依託之書

抱朴子論仙篇引董仲舒所撰李少君家錄又至理篇引孔安國祕記皆後人依託而為之者也

### 萬畢

淮南子含處吐火之術出于萬畢之家案唐志淮南子外篇有萬畢術一卷亦高誘注今不傳

### 焦山古鼎

蔣虎臣超蔣說曰焦山有文王鼎不知傳自何時今所置云是贗物真鼎為縣令昇歸新城二王俱賦古鼎詩焦山之鼎余親見之疑非贗者

### 孫子算術

孫子算術曰六粟為圭十圭為撮十撮為勺十勺為合又曰蠶所

吞絲為忽十忽為秒十秒為豪十毫為釐十釐為分

縣牛頭賣馬脯

三輔決錄注<sup>世</sup>祖詔漢中太守丁 曰縣中頭賣馬脯盜跖行孔子語高誘注呂覽曰里諺所謂牛頭而賣馬脯說苑晏子謂景公曰猶懸牛首于門而求賣馬肉也蓋古諺有是

果園

御覽十道志曰靈州有赫連勃勃所置果園水經云河水北薄骨律鏡城在渚上舊赫連城也桑里<sup>果</sup>榆林列植其上故謂之果州又圖經曰周宣政二年破陳將吳明徹遷其人于靈州江左之人崇禮好學習俗皆化因謂塞北江南故韋瞻詩曰賀蘭山下果園成塞北江南舊有名楊升菴<sup>林</sup>伐山引杜氏通典以為在涼州者非

子公

王褒童約曰雨墜如注<sup>瓦</sup>板<sup>薜</sup>戴子公注薜蓑衣也子公笠也按御覽引今童約無是語

春秋變周

曾王父曰春秋變周<sup>此語出淮南子</sup>昭代之禮衰矣下堂而見諸<sup>侯</sup>覲禮之衰也喪妻三年喪服之衰也

經術飾吏事

漢儒以經術飾吏事故仲舒以通公羊折獄平當以明禹貢治河皆可為後世法

魯哀公

魯哀公曰寡人生于深宮之中長于婦寺之手未嘗<sup>知</sup>憂未嘗知懼惠子曰此非哀公之言也使哀公而為此言必無遜越之事

食熊白詩

徐龍友注阮亭精華錄近體六卷事跡頗略而兼有未當宋牧仲  
邀食熊白詩云故人寒置酒熊白亦初脰已下何公著寧思漢殿  
時藝藏元自密攻穴苦相危當<sup>食</sup>勞三歎風花滿意吹徐君子漢  
殿注引長楊賦序上命右扶風發民入南山捕熊羆豪豬載以檻  
車輸長楊射館云云殊與詩無涉余謂漢殿乃用馮健仔故事已  
下何公著寧思漢殿時此昔人所謂推食忘憂也言當何公下著  
之時寧思漢殿當熊之日乎末云當食勞三歎蓋言異味食之甘  
得之難故當食而勞三歎亦詩人忠厚之遺也徐君注余已為改  
正二百餘條增注四十餘條尚欲補注古體四卷以行於<sup>世</sup>未  
知何日汗青姑書之以當息壤

鼎湖原詩

阮亭鼎湖原詩云素女為師態萬方如聞天老教軒皇馬肝已諱  
文成死又見神君記柏梁此詩譏漢武也言求仙不得更習為房  
中之術仍無益於長生也王充論<sup>衡</sup>畫曰素女為黃帝陳五女之法  
非徒傷父母之身乃又賊男女之性素女為師二句用張平子同  
聲歌也漢武故事言上造神君請術行之有效<sup>效</sup>大抵不異<sup>容</sup>成也  
行人衣上雨  
古人云百里不共雨余每行役遇雨雨過復取道行里許天氣晴  
明略無雨意願視衣蓋猶霑霑濡韋左司詩云家從東方來衣上  
灞陵雨阮亭先生使秦蜀詩云行上<sup>人</sup>衣上雨來自杜陽川未行役  
不知此詩之工也

寇萊公

釋子文瑩言寇萊公歷富貴四十年無田園邸舍入覲則寄僧舍

或僦居故其時門下士贈公詩有無地起樓臺之語采詩者咸謂中的後人以萊公晚年竄謫遂有舉蠟淚成堆諸事為豪侈所致殊不知此是布衣時事後山叢談嘗言之王尚書阮亭所云萊公英雄本色所以不可及也尚書嘗有謂忠愍公祠詩云柘枝舞罷蠟成堆千束吳綾夜宴聞不是魏三詩句好誰知無地起樓臺此詩蓋知萊公之深者也

### 赤泉

陶潛讀山海經第八篇云赤泉給我飲負邱足我種姚桃令威曰今赤泉山海經無之知古文缺失也余按御覽引外國圖曰負邱有不死樹食之乃壽有赤泉飲之不老又七十卷引括地圖曰昆邱之上有赤泉飲之不老外國圖括地圖與上海經相表裏郭景純注亦引之皆古書也

### 神人

蕭韶大清記曰劉教姊文彩艷質甚於神人也

### 折綿

阮籍大人先生歌曰陽和微弱陰氣竭 練不流綿絮折呼呼不通寒惻惻詩用折綿始於此山谷以為始于庾肩吾者非也

### 四上

楚詞大招曰四上競氣極聲變只家君曰四上猶今四上尺等為七調猶古之七音也按今民間六孔笛放開四孔低吹為四六孔全開低吹為上

### 張鎬

趙謙

趙謙斬曹紹張鎬殺閻邱曉皆千古快事

紹曹節  
從子

### 金山寺詩

宋蘇紳題潤州金山寺詩云僧依玉鑑光中住人踏金鼉背上行  
漁湯<sup>洋</sup>山人登金山寺詩云絕頂高秋盤鶴鶴大江白日踏鼉鼉次  
句意本蘇詩一經鑪錘分外沈雄

闡虛

家君子曰張平子雲憲指闡虛為地影千古卓識

忠著竹素

顧子曰昔梁邱據之使諫景公也于房晏子之諫景公也于朝然  
晏之忠著於竹素梁邱之優<sup>優</sup>於今不絕亦惟公平正直者聖之所  
先矣

古字假借

鄭康成曰其始書之也倉卒無字或以音類比方假借為之趣於  
近之而矣

二尺四寸

五經古文皆二尺四寸策見鄭康成論語注漢律亦二尺四寸見  
鹽鐵論

四經

春秋以前止有四經管子曰澤其四經謂詩書禮樂也及孔子贊  
易作春秋始著六經之目

字有磨滅

周礼注拍稔字磨滅之餘禮記注衣當為齋壞字交于旦明旦當  
為神篆字之誤古神字作曾見鄭子春北岳神廟碑莊有旦宅而  
無情死旦讀為神

禮運

白虎通引禮運云六情所以扶成五性也今禮運無此語

馬一疋

文心雕龍曰周禮并賦舊有疋馬應劭釋疋為量首數蹄斯豈辨物之要哉按藝文類聚九十三卷載應劭風俗通曰馬一疋俗說相馬及君子與人相疋或曰馬夜行目相照前四丈故曰一疋或曰度馬縱橫適得一疋或說馬死賣得一疋帛或云春秋左氏說諸侯相贈乘馬束帛帛為疋與馬之相疋耳按今風俗通無此語非全書也

頭馬頭錢

茶曰頭綱見北苑茶錄鵝白頭鶯見草木子馬曰頭馬見唐書回紇傳錢曰頭錢餞見陸放翁筆記

匹製承盤

先王父曰匹製即今之套套杯也鷄彝鳥彝皆有舟今之承盤也

六菝

六菝曰文王祖父壽百二十而沒王季百年而沒文王壽九十七而沒

難經

皇甫謐帝王世紀曰黃帝有熊氏命雷公岐伯論經脉傍通問難八十為難經教著九針著內外術經十八卷玉璣針經序曰呂博少以醫術知名善診脉論疾多所著述吳赤烏二年為大醫令撰玉璣針經及注八十一難經大行於世

玉斗

王逸子曰自幽厲禮壞樂崩天綱弛絕諸侯力政轉相吞并德不能懷威不能制至於赧王遂喪玉斗余按玉斗可對金甌

逃瘧

國家圖書館, NATIONAL CENTRAL LIBRARY, TAIWAN

魏文帝列異傳曰大司馬河內湯蕤字聖卿少時瘡病逃神中有人呼杜却杜卸聖卿曰諾起至戶中人曰取此書去得素書一卷皆謹劾百鬼所劾輒効逃瘡已見漢魏時或謂始于高力士非也

墓誌之始

馮鑑續事始曰案西京雜記前漢杜子春臨終作文命刻石埋于墓前恐墓誌因此始也事物紀原王阮亭先生云佔筆史繩祖學齋佔筆戴戴漢西京時南宮寢殿內有醇餘儒王史威長葬銘曰明明知哲士知存知亡崇隴原野非窳非康不封不樹作靈垂光厥銘何依王史威長云見張茂先博物志此西漢墓銘之最古者

焦京易學

禮記月令正義按易林云震主庚子午巽主辛丑未坎主戊寅申離主己卯酉艮主丙辰戌兌主丁巳亥易林焦贛所撰今本無此

乃納中之法京房易傳所本也

卦氣

卦氣之學傳自孟喜蓋周秦以來遺法京房傳全用卦氣其後谷永劉歆荀爽馬融黃復皆祖其學秦燔詩書而易以下氏筮獨存故九宮納甲卦氣爻辰諸學存焉尚書遭燬故洪範五行之說不傳惟略見於伏生書劉更生傳其學其學皆亡惜哉易乾鑿度亦用卦氣

洛陽詩

阮亭先生洛陽詩云國本爭來黨錮連楚謠楚舞亦堪憐如何鴻鵠高飛去又見蒼鷺出地年或疑是詩所指余曰此詩首言國本定而漢室安黨錮連而漢室亡舉東西兩漢而言之也次言高祖不以所愛而易國本故能建四百之基若晉之惠帝信賈后而廢

太子適其後遂有劉石之禍因舉鴻鵠蒼鵠兩事以驗之也

### 家君詩

家君送友人南歸詩云秦坐<sup>望</sup>草荒樵逕出吳江楓落釣船涼雲閣  
學楊玉符先生愛之常為人書桃符玉符家君同年生之父也錢  
楊閣學名瑄松江人  
雲下似當有間字

### 管子

管子權修篇曰微邪者大邪之所生也立政篇曰盍過于君子而  
毋失于小人過于君子其為怨淺失于小人其為禍深又曰見賢  
不能讓不可與尊位

### 半星

管子宙合篇曰歲有春秋冬夏月有上下中旬日有朝暮夜有昏  
晨半星注星半隱半見也

### 長度

管子輕重甲篇對桓公曰請使州有一掌里有積五窳民無以與  
正籍者予之长假死而不葬者予之長度宋長春按长假補助之  
謂長度漏澤之謂

### 遠水不救近火

韓非子喻老篇失火而取水于海海水雖多火必不滅矣遠水不  
救近火也

### 文子語與管子相發明

說林篇云衛將軍文子見曾子曾子不起而延于坐席正身於奧  
文子謂其御曰曾子愚人也哉以我為君子也君子安可毋敬也  
以我為暴人也暴人安可侮也曾子不僂命也 文子之言是也  
謂曾子而有是事是誣賢也詩小旻之卒章正謂不侮暴人曾子



將終而引其語謂而今而後吾知免夫與此相反明非曾子又曾子子曾申亦稱曾子

虱訟 鼠獄

虱訟見韓非說林鼠獄見漢書張湯傳

賣庸播耕

外儲說曰夫賣庸而播耕者主人費家而美食調布而求易錢者非愛庸客也曰如是耕者且深耨者熟耘也庸客致力而疾耕耘者盡巧而正畦陌疇時者非愛主人也曰如是羹且美錢布且易云也

郢書燕說

外儲說曰郢人有遺燕相國書者夜書火不明因謂持燭者曰舉燭云而過書舉燭舉燭非書意也燕相受書而說之曰舉燭者尚

明也尚明也者舉賢而任之燕相白王天悅國以治治則治矣非書意也今世學者多似此類家君曰宋人不好古而好臆說故其解經皆燕相之說書也

升概甚平

外儲說曰宋人有酤酒者升概甚平遇客甚謹為酒甚美縣幟甚高著然不售

儒墨

顯學篇曰孔子之死也有子張之儒有子思之儒有顏氏之儒有孟氏之儒有漆雕之氏儒有仲良氏之儒有孫氏之儒有樂正氏之儒有墨子之死也有相里之墨有相夫氏之墨故孔墨之後儒分為八墨離為三取舍相反不同而皆自謂真孔墨

漆釀

卞中丞永譽書畫彙攷曰王晉卿八帖皆與親賢宅諸王書內有送酒一帖曰瀑釀四器納上以酒稱釀可謂好奇

### 墨王

汪伯玉墨花閣雜誌曰米南宮稱法書曰墨王可謂極稱非石軍大令東武亭不足當也按此亦見研北雜志

### 五司禮闈

杜牧贈吏部尚書崔公郾公行狀公與伯兄季弟五司禮闈再入吏部國朝以來未之有也

### 城隍攷

顧寧人菴中隨筆曰洪武二年禮官奏考城隍之祀莫詳其始先儒謂既有社矣不應復有城隍故唐李陽冰縉雲城隍祀謂祀典無城隍惟吳越有之然成都城隍祠大和中李德裕所建張說有

祭城隍文杜牧有祭黃州城隍文則不獨吳越為然北齊慕容儼鎮鄆城中先有神祠俗號城隍神又蕪湖城隍建于吳赤烏二年高齋慕容儼梁武陵王祀城隍皆書於史又不獨唐而已

又曰古者諸侯既立社稷又為五祀曰司命中雷國門行<sub>公</sub>屬是也鄭氏謂國門為城門今之<sub>垣</sub>城隍也然今州縣所祀如吳之春申及永嘉之周苛天台之屈<sub>垣</sub>興<sub>國</sub>之姚<sub>國</sub>婿亦不一概焉

### 慈幼局

顧寧人菴中隨筆曰宋時諸郡有慈幼局貧家子不能育者許抱至局書生年月日時局有乳媪鞠養之他人家或無子女來取于局歲殺子女多入慈幼局故道無拋棄子女

### 天一閣

潛<sub>卿</sub>劄記曰右司馬范欽字堯卿號東明性喜藏書購海內異本

與王鳳洲家藏以書目取較各鈔所未見相易故浙東藏書家以  
范氏天一閣為第一

書院 復社

又云東林書院復於萬曆甲辰首善書院院建於天啟曰天下書院毀  
於天啟己丑復社起於崇禎辛未會試

韓社

又云按姜宸英曰世薄韓退之屢干執政者然子美始入京師一  
投張均兄弟再贈鮮于通二君皆非端士而窮途不免為此士之  
矢志寧堪問乎

撫塵

應璩與曹公牋曰昔漢光武與戴子高有撫塵之好苑文

雅拜

太祝九拜七曰奇拜杜子春曰奇讀為奇偶之奇謂先屈一膝今  
雅拜是也

世本左傳異字同音

魏準卻準世本作州公叔發世本作拔公叔朱世本作戌

平山

相如賦夾夢築堂服虔曰平此山以為堂如淳曰夢山名也

進履袜

後魏北京司徒崔浩女儀云近古婦常以冬至日進履袜於舅姑  
袜亦作襪  
並云伐反

九曜齋筆記卷二

鄉飲酒

儀禮鄉飲酒疏曰凡鄉飲酒之禮其名有四案此賓賢能謂之鄉飲酒一也又案鄉飲酒義云六十者坐五十者立侍是黨正飲酒亦謂之鄉飲酒二也鄉射州長春秋習射於州序先行鄉飲酒亦謂之鄉飲酒三也案鄉飲酒義又有鄉大夫士飲酒國中賢者用鄉飲酒四也其王制云習射尚功習鄉尚齒還是州長黨正飲酒法

王駿不再娶

王吉傳侍子駿為少府時妻死因不復娶或問之駿曰德非曾參子非華元亦何敢娶如淳曰華與元曾參之二子也韓詩外傳曰曾參喪妻不更娶人問其故曾子曰以華元善人一日曾參之子字

華元師古曰二子是也

喪次

士喪禮曰主人揖就次鄭注曰次謂斬衰倚廬齊衰望室也大功有帷帳小功緦麻有牀第可也

事三旬而成不愆于素

士喪禮獻材于殯門外主人徧視之又云獻素獻成亦如之鄭注云形法定為素飾治畢為成彼言斲治椁林之事如鄭說則素者前所授之形法也成者城工畢也

鄒邠

陸績述玄曰績昔嘗見同郡鄒邠字伯岐與邑人書嘆楊子雲所述太玄伯岐為吾吳人物未知吳郡志載否陸績述玄一篇見范望本太玄前

賁色不純

太玄殯次二曰殯象屯卦黃不純屈于根范望注曰二在三下木下有火故相屈也不純者火色黃白故曰不純也易賁卦曰山下有火黃白色也

檀釀

楊億傳燈錄序或非古德之文間廁編聯徒增檀釀亦用簡別多所屏去

志

章楓山蘭谿志 馬應龍安邱志 邢侗武定洲志卷十五 史蓮

芍介休志 嚴嵩袁州府志卷十四 都元敬黃山圖經 李懋卿

東莞志 邵賢許州志卷三 趙浚齊平源府志源 胡纘宗秦州志

卷三十 汪來北地志 喬世寧耀州志三十一卷嘉靖三十四年修 王九思鄆

志 康海武功縣志卷三 韓邦靖朝邑志卷二 張光孝華州志

馬慥同州志 列九經廊志 李于鱗青州府志 楊循吉章邱

縣志卷四 呂坤寧陵縣志卷十二

訓詁

訓詁漢儒其詞約其義古宋人則辭費矣文亦近鄙

漢末用貢舉之弊

抱朴子審舉篇云靈獻之世閭宦用事群姦秉權危害忠良臺閣失選用于上州郡輕貢舉于下夫選用失於上則收守非其人矣貢舉輕于下則秀孝不得賢矣故時人語曰舉秀才不知書察孝廉父別居寒清素白濁如泥高第良將怯如雞又云古人欲達勤誦經今世國官免治生蓋疾之甚也于時懸爵而賣之猶列肆也爭津者買之猶市人也有直者無分而徑進空拳者望途而收迹

其貨多者其官貴其財少者其職卑故東園積賣官之錢崔烈有

銅臭之嗤上為下劾君行臣甚故河佞幸獨談親容桑梓議主中

正吏部並為魁僧中正起各責其估清貧之士何謂有坐哉望法如

本作怯如龜泥音迥龜音密

六物

抱朴子辨問篇玉鈴經去主命原由人之吉凶修短制在於結胎受氣

之日皆上得制在列宿之精其值聖宿則聖值賢宿則賢值文宿

則文值武宿則武值貴宿則貴值富宿則富值賤宿則賤值貧宿

則貧值壽宿則壽值仙宿則仙值又有神仙聖人之宿有治世聖

人則之宿有兼二聖之宿有貴而不富之宿有富而不貴之宿有

兼富貴之宿有先後富貧之宿有先貴後賤之宿有兼貧賤之宿

有富貴不修終之宿有忠孝之宿有兇惡之宿如此不可具載其較

略如此

詩小弁曰天之生我我辰安在鄭箋云辰謂六物之吉凶

### 水旱免稅令

水旱免稅令諸田有旱蟲霜處則拘見營田州縣檢實具帳申省十四損已上免租稅調七已上課役俱免若桑麥俱盡各免其所輸聽折來年經二年後不在折限其應免者通計麥用為分數白

帖六

### 湖廣總論

景范湖廣總論曰以天下形勢言之則重在襄陽以東南形勢言之則重在武昌以一省形勢言之則重在荊州。

### 東南形勢

呂社曰吳紀涉之聘魏也司馬昭問吳成備哉何曰西陵至江都

五千七百里又問道里甚遠難為固守對曰疆界雖遠而險要必爭之地不過數四猶人有八尺之軀其護風寒亦數處耳今所謂險要必爭之地者不過江陵武昌襄陽九江江水源於岷山下夔峽而抵荆楚則江陵為之都會岷家導漾東流為漢漢沔之上則襄陽為之都會沅湘眾水合洞庭之波而輸之于江則武昌為之都會豫章西江與鄱陽之浸浩瀚吞納而匯于湓口則九江為之都會守江陵可以開蜀道守襄陽可以援川峽守武昌可以蔽金吳蜀漢吳楚併而為一則東南之守亦固矣上同

### 薙髮 金人服

西漢曰遼金制士人皆衣冠不薙髮至元始戴笠薙髮 金輿服志金人之常服四帶巾盤領衣烏皮靴其束髮曰吐鵲上同

### 經術

潛邱語以禹貢行河以洪範察變以春秋斷獄或以之出使以甫刑按律令條教法以三百五篇當諫書以周官致太平以禮為服制以興太平斯真可謂之經術矣上

戶口錢糧

洪武三年二月癸酉上命中書省臣凡行郊祀禮以天下戶口錢糧之籍陳于臺下祭畢收入內庫藏之上

國志標式

白孔六帖曰祠部式國志日期明標邦式

指環

俗說曰晉哀王王皇后有紫磨金指環至小止可正少第五指著初學

龜兆

漢書文帝紀代王報太后計猶豫未定卜之兆得大橫 後漢書

梁皇后紀太史卜兆得壽房東觀記作戴房 續經漢書禮儀志

注蔡質漢官典職立皇后儀云卜之著龜卦得承乾 後漢書張

衡傳注龜經有棲鶴兆左傳僖二十五年晉將納王使卜之遇黃

試題

金史泰和六年鄉試賈鉉為監試官上曰丞相崇浩嘗言試題頗易由是進士例不讀書朕今以日合天統為賦題鉉曰題則佳矣恐非所以牢寵天下士也上曰帝王以難題窘舉人固不可欲使自今積致學業而已遂用之 乾隆二年試博學鴻詞于 閣以五六天地之中合賦命題此與日合天統皆出漢書律歷志子令兒輩讀漢書正謂此等難題也

經筵

金史益政院正大三年置於內庭以學問該博議論宏遠者數人



兼之日以二人上直備顧問講尚書通鑑貞觀政要名為經筵實內相也

### 致仕

白虎通曰臣七十致事仕者致其事於君君不使自去者尊賢者也王制曰七十致政鄉大夫老有盛德者留賜之几杖不備以筋力之禮在家者三分其祿以一與之所以厚賢也曲禮曰大夫致仕若不得謝則必賜之几杖杖度王記曰臣致仕於君者養之以其祿之半几杖所以扶助衰也

### 徙居說

詩碩鼠曰三歲貫女莫我肯顧遊將去女適彼樂土鄭箋云古者三年大比民或於是徙正義曰正言三歲貫女者以古者三歲大比民或於是遷徙故以三歲言之地官小司徒及卿大夫職皆

云三年則大比言比者謂大校比其民之數而定其版籍明於此時民或得徙地官比長職曰徙於國中及郊則從而校之注云徙謂不便其居也或國中之民出徙郊或郊民入徙國中皆從而付其所處之吏是大比之際民得徙矣何休公羊注云司空謹別田之高下善惡分為三品上田一歲一墾中田二歲一墾下田三歲一墾肥饒不得獨樂墾墉不得獨苦故三年一換主易居

### 嫁娶當慕賢者

公羊僖元年楚人伐鄭休何注曰楚稱人者為僖公諱與夷狄交婚故進使若中國又明嫁娶當慕賢者棟案楚與魯婚得進稱人故云嫁娶當慕賢者

### 象

熊太古翼越集云象能言有人知其言故通南方之語者名曰象

太學藏經

詩正義韓詩說辟靡者天子之學圓如璧壅之以水示圓言辟取  
辟有德不言辟水言辟靡者取其靡和也所以教天下春射秋饗  
尊事三老五更在南方七里之內立明堂於中五經之文所藏處  
蓋以草茅取其潔清也

假馬

周禮大司馬注云爭禽而不審者罰以假馬疏云假馬者謂獲禽  
取算之籌罰者謂效功時爭禽不審即罰去其籌

便

周禮射鳥氏注烏鳶喜鈔盜便汙人釋文便婢面反

馬茲 瓜當 爵族

鄭氏周禮圉師注云尊馬茲也 說文曰蒂瓜當也 哲族氏注

族讀為爵族之族疏云爵族是雀窠後鄭從之

褚先生

張晏云褚先生潁川人任元成間韋稜云褚顛家傳褚少孫梁相  
相褚大弟之孫宣帝代為博士寓居于沛事大儒王式號為先生  
續太史公書阮孝緒亦以為然也 索隱

太史公

桓譚新論云太史公造書書成示東方朔朔為平定因署其下太  
史公者皆朔加之者也

持虎

史記禮書寢兕持虎索隱曰寢兕以兕牛皮為席按以猛獸皮文  
飾倚較及伏軾故云持虎

家產奴

陳涉世家人奴產子小顏云猶今言家產奴也

繆

儒林列傳蘭陵繆生索隱曰繆音亡救反繆氏出蘭陵一音穆所謂穆生為楚元王所禮也

地說

鄭康成注禹貢引地說數條未詳何書劉淵林達注吳都賦引禹所受地說書曰崑崙東南方五千里名曰神州帝王居之即康成之地說也大史公引禹本紀山海經引禹大傳皆是書也

萬流屋

嵇康高士傳曰孔子問項橐曰居何在曰萬流屋注曰言與萬物同流匹也

文選注

王氏

琅琅邪王氏錄曰其先出自周王子晉秦有王翦王離世為名將文選蘇彥龍古意謂王中書云岱山饒靈異沂水富英奇李善曰漢舊有琅邪郡音義曰屬徐州晉書琅邪王氏之說先漢紀曰秦遷于琅邪之皋虞後徙于臨沂

名卑

朝子曰工商游食之民少而名卑文選注

理樂

如淳漢書注曰今樂家五日一習樂為理樂也

入梅出梅

四時纂要曰閏人以立夏後逢庚入梅芒種後逢壬出梅韻會

子輿

劉孝標辨命論云子輿困藏倉之訖李善注傳子曰昔仲尼既歿

仲弓之徒追論夫子之言謂之論語其後鄒之君子孟子與擬其體著七篇謂之孟子然子與孟子之字也

### 士不遇

司馬遷集有悲不遇賦董仲舒集有士不遇賦李善文選注

### 古文勝稱通

易繫辭曰吾凶者貞勝者也釋文云姚本作貞稱李善曰稱亦勝也吳錄子胥曰越未能與爭稱負也

### 簡上凝霜筆端風起

崔篆御史箴曰簡上凝霜筆端風起

### 案籍受傳 見符識引

胡廣漢官解注曰凡屋宮中者皆施籍于掖門作居當按其姓名當入者本宮長史為之封啟傳審其印信然後受之有籍者皆復

有符用木長二寸以所屬言兩字為鐵印分符當出入者案籍畢

復識處符識其物色乃引內之衛律下

### 限斷議

陸士衡晉書限斷議曰三祖實終為臣故書為臣之事不可如傳此實錄之謂也而名同帝王故自帝王之籍不可以不稱紀則追王之義

### 登科故事

升庵曰分甲第自興國八年王世則榜始御殿唱名自雍熙三年梁顥榜始賜宴自太平二年呂蒙正榜始梁顥宴于瓊林苑呂蒙正宴于開元寺遂為定制給金吾衛衛士送歸第自蔡齊榜始刻登科錄自霍端友榜始

### 榮始

伯父物府命銘榮公云節有九雖非伊耆之所授輔人無苟

建除

高貴鄉公集載自敘始生禎祥曰惟恩正始三年九月辛未朔二十  
十五日乙未直成予生

障壁具

顯溪陳宗之文彥可先生七哀初度序云彥可先生躋古稀諸子  
咸為歌詩頌蓋竊附昔賢賦詩言志之義于古為近而旋題錦贖  
歸熙甫所謂障壁具者雅非先生所樂雖然觴厄矣其可無一言

繼世文章

張獻翼書文博士和州詩集云夫韋有身成而孟益尊鄭待小同  
而元益著實得嘉而誼以經術者不哀盧籍謀而植以儒學用者  
不墜故潁川陳氏時人謂之公慚卿卿慚長非以世其家業不殞  
者之難乎然未有父子兄弟祖孫歷代名德並有集行於世如文

氏者也

楊南峰墓

陳均寧匡國鏡鏡居詩藁楊南峯先生墓在南濠祇園菴首歲久  
沒為菜畦僅留孤塚汪鈍翁先見而心惻以金斤代贖葺治完好  
余聞之慨然述此記之 一杯剗削幾經時樵采誰憐柳士師直  
以南峯謝保艾遂令鈍老費撐持春風漠漠新苔合宿草離離故  
塚知不為斯文寧有比可勝努力慰遐思

宏人之官

傅青主山霜紅龕集與胡崑葵書云顏師古急就章注引周禮宏  
人之官今周禮無所謂宏人之官師古豈別有所據耶乞崑丈教  
示

楷書

傅青主曰楷書不自篆隸八分來即奴態不足觀矣 家訓手帖

### 呂叔簡

池北偶談云江寧巡撫湯斌自言昔為方面時只遵寧陵呂叔簡先生從政錄行其撫吳亦此志云案呂坤字叔簡號新吾河南寧陵人姜宸英明史藝文志呂坤呂公竇政錄七卷

### 糊名謄錄

池北偶談云宋呂申公試卷中自稱名王柏題其後謂古意尚存盛如祥云淳元化中立糊名之法祥符中立謄錄之制則又在申公之前矣

### 如魚甘水

紫栢可重壽投子青和尚頌古集序臨川受性疎朴甘澹泊如魚甘水

### 塗丹間碧

宋章國光宣州符裏鎮重修普慈院記語

### 琵琶記典

斯王折續通考曰瑞安高明著書因友人有弃妻而婚於貴家者作此記以感動之思苦詞工夜深時燭焰為之相交至今猶為詞曲之祖事載杜坤誠齋雜記

### 呂坤謬說

呂坤四禮疑曰尊長稱妾以名卑幼稱以姑姊老而獨尊則稱如嫡注云卑幼之稱妾以姑姊古夫人稱媵妾之語如諸姑伯姊之類主君主母死撫諸子而年老獨尊妾自舉處以半母之體而弟妹姪孫稱謂當如嫂伯叔母伯叔祖母之稱蓋其子女已母之矣而嫡亡分無所壓同宗姻黨不得以嫡在之體裁抑之也愚按如坤

說則嫡子父母沒可尊庶母如母弟之兄嫂死可尊庶嫂為嫂矣  
後世有首妻死而崇其愛妾為夫人者其皆祖坤之說歟蓋妻死  
不得以嫡在之體裁抑之也坤在明末稱理學之儒而其言之悖  
謬如此何也父之姊稱姑姊坤以為古夫人稱嫡妾之語出何典記耶

呂坤尊朱子而駁周公

儀禮為周公所定夫子人而知之經典叙錄曰周公居攝曲為之  
故經禮三百威儀三千經禮謂周官也威儀謂儀禮也乃呂坤撰  
四禮疑于昏禮之下云庶見尊祖也見舅姑尊親也夫婦不同行  
可乎禮家之踈也家禮得之甚矣哉其敢于非聖也春秋齊高固  
及子叔姬來公羊傳曰其謂諸其雙而俱至者歟言雙而比之  
禽獸也古來夫婦有別未聞有夫婦雙而行禮者雙而行禮  
公羊謂之禽獸曾周公而創是禮乎呂坤非聖無法其不死于妖

書幸也

不知而作

子曰蓋有不知而作者不知謂不從見聞中所得而鑿空妄造者  
朱子謂不知其理郢書燕說何嘗無理

草亡木卒

救齋集屢用草亡木卒語案四字見東維子集元故用軒先生墓  
誌銘云番有隱君子為用軒先生先生歿十年所其嗣元璧即克  
葬尚銜哀弗置走余錢唐次舍拜有請曰先子生有輔世志訖不  
得祿位以死片言簡行有幾古人死不得文而可傳者銘是與草  
亡木卒等不孝孤罪甚云云

庸貴富人

鐵崖淵默先生碣銘云強日足跡未嘗一至庸貴富人門鄉人盡

聞先生然終身有不識先生為短長瘠肥者

郎奎金

郎奎金字公在浙江仁和人嘗刻五雅以劉熙釋名改為逸雅自我作古不可以訓

張儋伯

張錫爵字儋伯嘉定人康熙五十五年與余同補博士弟子員乾隆己巳未晚晤予別釋三十四年矣贈余詩云三十年前問惠施翩翮公子擅文詞縹囊湘帙吳歐舫丹荔紅蕉嶺外危老去相逢霜滿鬢秋來閉閣草侵墀著書擁鼻名家事莫厭虛堂病起遲盖于丁卯秋病至己巳尚未已也張有集 卷

恩貢

蘇州府志泰昌元年恩貢績奉旨照歲貢例行

歲貢

廩生年四十以上者准入監讀書縣志云在成化初年疑是天順六年

白衣觀音

顧寧人菰中隨筆曰五雜俎今天下詞宇香火之盛佛莫過于觀音大士仙莫過于呂公純陽神莫過于關公雲長大士變相不一而世所崇奉者白衣為多亦有白衣觀音經曰專主祈嗣生育之事此經大藏所不載不知起何時也案遼志有長白山在冷山東南千餘里盖白衣觀音所居其山鳥獸皆白人不敢犯則其奉祀從未久矣

道味

正月廿一日睡覺道味滿于胸中數年樂境唯此為最己巳正月記



魏敏果

康熙初蔚州魏敏果公穉用事引進平湖陸清獻公其睢川湯文正公斌諸人大清得人於茲為盛易泰初九曰拔茅茹以其彙征吉其敏果之謂歟

經學詩學

經學盛于漢漢樂府皆奏之郊廟東漢始有擬作漢末建安七子及魏以後黃初正始之間五言始興六朝尤盛唐以後則有專攻者詩詩學盛而經學衰則始于魏以後也

孔顏

唐人詩學最盛孔穎達顏師古二人通經史獨無詩名

本朝經學

近代經學北平孫退谷澤五經皆有著述而其書不足傳崑山顧

寧人博極羣書獨不通易學蕭山毛大可仲氏易南海屈介子易外非漢非宋皆思而不學者也

朱震

漢上易傳頗嫌辭費亦不能盡通漢學經師亡之故也

漁洋詩

近來不喜漁洋詩者皆天分過高之人及觀其自作詩於漁洋之秘則概乎未之有聞也詩小使伎耳猶如此以此知學問之難

漁洋學詩

漁洋詩能盡窺古人之秘擇善而從故當時有集大成之自然於杜韓亦有不能到處漁洋頗不滿意于杜

義利

利者義之和也利與元亨貞稱四德周語言義必及利說文利從

曰和然後利利本與義合故以義為利則可利與義分是以利為利而利不可言矣故夫子斥之

漢宋

漢人經術宋人理學兼之者乃為大儒荀卿稱周公為大儒大儒不易及也

山海經

子公羊子解春秋用雙之之鳥王充論衡曰董仲舒略重常之鳥劉子政識貳負之尸皆見山海經仲舒傳公羊學亦讀山海經可知秦漢大儒皆博物重常鳥今本山海經不見蓋已缺矣

偽尚書出中候

竹垞谷蕭山毛檢討書論書今古文中及魏博士高堂隆所稱曰稽古帝舜曰重華建皇授政改朔一十五字證重華以上九字不

始於大航頭此說非也案御覽八十一卷引尚書中候考河命曰曰曰若稽古帝舜曰重華欽翼皇象高堂隆乃来自中候建皇以下當亦中候之文但御覽所引不全耳偽古古文之謬詳予所撰古文尚書攷

大手筆

義山韓碑云古者世稱大手筆此事不繫于職司真名言也文章必繫于職司則一代無名文矣近日開修書館必以大學士尚書為總裁此大手筆繫于職司也

擾人

楊雄解難曰擾人亡則匠石輟斤而不敢妄斲服虔注云擾古之善塗墜者也施廣領大袖以仰塗而領袖不汗有小飛泥誤著其鼻因令匠石揮斤而斲知匠石之善斲故敢使之也——師古注云墜即今之仰泥也泥去聲擾扞拭也故謂塗者為擾人擾音乃高反

又音迴迴反

錢吳

嘉定王孝廉鳴盛為予言其同邑諸生錢天旰字曉徵年少力學十七史皆能成頌誦己巳正月廿八日同里顧秀才德馨為予言金楫吳煥字荀叔工西法天文及等書音其父敏軒先生亦名士也庚午十月九日辛未三月八日皇上南巡錢吳皆獻詩二十七日。御試于江寧將軍辦事衙門二人皆欽賜舉人授內閣中書學習行走

詩賦中式

辛未三月。皇上南巡獻詩賦者江蘇一百三十三名學臣莊擬取三十五名安徽三十九名學臣雙擬取十二名。御覽准試三名詩陸陸遵考中五名蔣雍植錢大昕吳煥褚寅亮吳志鴻奉旨照浙江例特賜舉人授內閣中書學習行走考中進士一人孫夢

達授內閣中書遇缺即補。閱卷者三人渤海相國高東軒賦少司馬汪由敦少司寇錢賦犀

璩像

通典曰高宗乾封元年正月東巡次兗州鄒縣祭宣文廟開元八年勅改顏生等十哲為坐像悉應從祀曾參大孝德冠同列特為璩像坐於十哲之次圖畫七十子及二十二賢左邱明至賈逵於廟壁上以顏子亞聖親為之贊以書于石閣損以下令當朝文士分為之贊。大唐文明元年九月冊立元皇帝妻為先天太后立尊像於老君廟所唐已有先天之說則先天圖當始于唐世道家

清詞

通典天寶四載勅太清宮行禮官宜改用朝服並停祝板改為清詞

五十凡

釋例終篇云稱凡者五十其別四十有九蓋以母弟二凡其義不異故也隋志有春秋五十凡義疏二卷潛邱劉記

廣平公

顏真卿唐故大尉廣平文貞宋公神道碑云中書令河東公張公傑出將明之材獨運廟堂之上鏡機明澈見事風生求公規模悉閱堂案每至危言讜議執正守中未嘗不廢卷失聲汗流夾背其為通賢所服也如此 雅善戲謔不常矜莊凡所詎諧人輒疏取

潛邱劉記

陳同父

宋史儒林傳陳亮字同父永康人嘗曰研窮義理之精微辨析古今之同異原心於秒忽較禮於方寸以積累為工以涵養為正辟

面盎背則於諸儒誠有愧焉至於堂堂之陣正正之旗風雨雲雷交發而並至龍蛇虎豹變現而出沒推倒一時之智勇開拓萬古之心胸自謂差有一日之長

古人重道統

潛邱劉記曰韓文公之壻李漢為文公作集序止稱門人而不稱壻朱文公之壻黃幹為文公作行狀止稱門人而不稱壻古人重道統而輕私親如此

君子小人

又曰宋元祐中朝士以類相從有洛黨蜀黨朔黨之分又有不立黨者又有慙直無黨者至章蔡用而諸賢盡錮為奸黨是君子始異而終未嘗不同也萬歷中東林相角者有崑崙黨宣黨又有齊黨楚黨浙黨三方鼎峙之名至魏閣出而諸黨盡化為逆案是小

人始異而終未嘗不同也

藝苑德音

又曰王莽時求封司馬遷後為史通子宋神宗封三閣大大屈平為忠潔侯元至元二年追謚唐杜甫為文貞至貞十七年追謚唐劉蕡為文節此數公皆以曠世之才負忠憤之氣或被讒以死或賣志以歿而獨見褒於百世後之人主亦可謂藝苑之德音文人之寵遇矣

貧不學儉

魚秦曰三國志注謗言貧不學儉卑不學恭非人性分也勢使然耳潛邱

劉記

書味

潛邱劉記曰朱子曰漢書須到不忍舍處方是見得真味其黃魯直

曰棄書冊而游息時書味在胸中陸務觀詩曰睡餘書味在胸中

跳出

左傳襄二十五年傳會于夷儀之歲云云杜預曰傳為後年修成起本當繼前年之末而特跳此者傳寫失之跳直正義曰說文跳躍也謂足絕地而高舉也魏晉儀注寫章表別起行頭者謂之跳出故杜以跳言之

孔冲遠

孔穎達字仲達碑字冲遠冲詭為仲遠詭為達孔碑余親見之

時文

潛邱劉記曰崑山吳喬輪八比時文曰自六經以至詩餘皆是自說己意未有代人說話者維元人就古事作雜劇始代他人說話八比時文雖闡發聖經非注非疏代他人說話亦然故曰俗體也

喬修齡著  
圓爐詩話

魯詩

周頌曰鼎鼎及鼐說文曰鼐鼎之絕大者魯詩說鼐小鼎愚案說苑尊賢篇曰詩曰自堂徂基自羊徂牛言以內及外以小及大也如魯詩說則鼐大而鼐小劉更生傳魯詩此說得之申公頗勝毛鄭韓詩外傳曰詩曰自堂徂基自羊徂牛以小成大

數

應劭風俗通曰十生萬萬生億億生兆兆生京京生秭秭生垓垓生壤壤生溝溝生澗澗生正正生載廣韻上聲五地不能載也旨秭字下一位算法萬萬穰為載數之極矣或問之曰何以數之為載按孫子算經云古者積錢上至於天天不能容下至於地地不能載天不能蓋地不能載故名曰載御覽七百五十卷御覽所載風俗通與

廣韻稍異而加詳並載于下 風俗通曰十十謂之百百謂之千

十十謂之萬十萬謂之億十億謂之兆十兆謂之京一作十京謂

之垓十京為十垓謂之捕垓字十捕謂之選缺溝澗正三數十選

謂之載十載謂之極有物者有事者紀於此矣過此往者則其數

可紀其名未之或聞也夫數一為持侯奇隻持疑二為再兩隅當

耦三為參一作四為乘七百五

田假

假寧今全曰諸內外官五月給田假九月給授衣假為兩番各十五日田假若風土異宜種收不等通隨給之御覽六百三十四卷

古人配社

胡朏明注韓文問古之所謂鄉先生沒而可祭於社者事何出余檢孔融傳為北海相郡人甄子然臨孝存知名早卒融恨不及之

乃命配食縣社以對又御覽鄉先生見儀禮鄭注潛邱記莊子社而稷之漢書樂有為燕相燕齊之間皆為立社號樂公社昌黎用樂公社事

廳事祭

盧諶祭法曰凡祭法有廟者置之於座未遑立廟祭於廳事也御覽一百八十四

合葬祔葬

潛邱劉記曰宋真宗咸平二年禮官言故事帝后同陵謂之合葬同塋謂之祔葬

象環

孔子集語孔子去魯佩象環五寸言其有文理也環可循環而無窮也出禮記玉藻云孔子佩象環五寸而綦組綬注云謙不比德亦不

事也象有文理者也環取可循而無窮正義曰孔子失魯司寇故謙不復佩德佩及事佩亦已無德事也五寸法五行

生理

詩谷風曰既生既育箋云生謂財業也或云治生之生本此

呂公

相經云魏人呂公名文字叔平也漢書舊儀云呂公汝南新蔡人索隱呂公善相人見史記

善文

按善文稱隱士云趙高為二世殺十七兄而立今王則二世是弟十八子也索隱又姚氏按隱士遺章邯書書云李斯云二世廢十七兄而立今王陳涉世家索隱

左氏鼎書

東觀漢記曰廬江獻鼎詔召鄭眾問齊桓公之鼎在栢寢臺見何書曰春秋左氏看鼎書幾眾對狀除為郎中御覽七百五十六

郟大鼎桓二年九鼎同上又宣三年吳壽夢鼎九年讒鼎昭三年

鼎昭五年正考父鼎昭七年莒二方鼎昭七年徐甲父鼎昭十年

年昭九年鄭刑書鼎未見鼎字衛文舒鼎定六年

蔽賢赤面

晉傅咸畫像賦序曰先有畫卞和之像者以為臧文仲知柳下惠之賢而不與立卞和自刖以有證相去遠矣戲畫其像於卞子之旁特亦其面以示猶有慚色同上

畫扇

沈約俗說曰顧虎頭為人畫扇作阮籍稽康都不點睛送還扇主曰點眼睛便欲能語同上

蠱卜

春秋後語曰蘇秦事鬼谷子學終辭歸道乏困行以燕人蠱卜傳食自給燕人用蠱下秦記此以取各解臧獲之裘臧獲後人解其說之言也御覽七百二十六吾吳行卜者皆託鬼谷子豈蠱卜之法秦亦傳之鬼谷後人遂云鬼谷善卜耶近日稱善卜者陳覲文余嘗叩以三錢代著之起渠云起自鬼谷子子笑曰鬼谷子三卷皆縱橫之術未聞論易法若此言出何書也陳無以對因詢于三錢所起子曰案項安世朱晦菴皆云三錢代著起於火珠林交單靈重拆之說孔穎達易正義賈公彥儀禮疏皆有此事蓋京房遺房也唐人之鵲詩暗擲金錢卜遠人明人陳繼儒遂謂起于唐亦誤也陳聞之憮然

饋埽



續漢書曰許邵字子將邵知人入饋肆拔樊子昭御覽六百八十七

五代史志

潛邱劄記曰唐命魏徵修隋書命長孫无忌修五代史志志成即入隋書故隋書志兼齊周梁陳之事而李百藥令狐德棻姚察父子遂不復贅四代之事於其史中當時發皇凡起例必有成說也

宮觀置提舉

又曰仁宗康定二年參知政事李若谷罷為資政殿大學士提舉會靈觀宮觀置提舉自若谷始也

准此

鹵簿令曰安車紫油通幃紫油纁朱裏四望車清油通幃清油纁並朱絲絡網后及王太子車幃並准此通一作道 御覽七百七十六

承色 卷音謹

三禮圖曰卷取四升觶中破夫婦各一御覽七百六十二

三禮圖曰觶三升受允音下足漆赤中青雲飾小其尾御覽七百六十一殘槃冷炙

郭子曰王光祿曰正得殘槃冷炙御覽七百五十六少陵詩殘盃與冷炙到處潛悲辛

曲木抱腰

語林曰任元稹為光祿勳孫翊往詣之見門吏憑几視孫入語任曰吏憑几對客為不禮任便推之吏答云得罰體痛以橫木扶持非憑几也孫曰直木橫施植其兩足便為憑几何必孤鵠繫蟠膝曲木抱腰御覽七百十卷

警枕 六安枕 無患枕

蔡邕警枕銘曰應龍蟠蟄潛德保靈制器象物示有其形哲人降鑒居安慮傾案此警枕不始于曹公 崔駰六安枕銘曰枕有規矩恭一其德承先寧躬終始不忒六安言六面安也 下敬宗作無患枕讚無患木名也言人枕之無患也半農先生曰無患枕可入詩

楊子烏

劉向別傳曰楊信字子烏雄弟二子幼而聰慧雄竿玄經不會子烏令作九數而得之雄又儼易羝羊觸藩彌日不就子烏曰大人何不云荷戟入榛御覽三百八十五

河

大學衍義補曰周以前河之勢自西而東而北漢以後河之勢自西而北而東宋之後迄于今則自西而東而又之南矣潛邱劉記

卦无先天

他石錄外編儒辨第二十五論先天八卦之非 又云本義之混濫者多矣以天地定位章為第一潛邱劉記 他石錄吳喬撰 養相體

金之將亡也臨事不肯分明可否相習低言緩語互推讓號養相體潛邱劉記

吳才老 趙武

揮塵錄吳才老舒州人 趙武當生于成公元二年間二則俱潛邱劉記

脉訣 措大

脉訣乃宋中世人偽託或曰五代高陽生所著措大出五代東漢世家

點筆

少陵詩石欄斜點筆廣韻微微點筆莫佩中

堪輿

甘泉賦堪輿壁壘張晏曰堪輿天地總名也孟康曰堪輿神名造圖宅書者

骨肉灑血

南史豫章王綜列傳聞俗說以生者血灑死者骨滲即為父子潛

劉會稽先賢傳曰陳業字文理郡守蕭府君卒業與書佐魯雙

率禮送喪斐道溺于水業因掘泥揚波援出其尸又業兄度渡復

見傾命時同依止者乃五六人骨肉消爛而不可祀記別業仰皇

天誓后土曰聞親戚者必有異焉因割背流血以洒骨上應時得

血住餘皆流去御覽四百二十一

立壁橫峰

庾信終南山義谷銘膠廓上浮崢嶸下鎮立壁千丈橫峰萬仞白

帖六

哀帝

漢名臣奏云伏聞東平國無鹽縣山東有中大石無故一夕自起立

臣愚以為石者陰類殆有微人當紹起者漢興來與今再見其一

正以昭帝無繼嗣見今又以陛下無繼嗣復見帖白當指哀帝

楹書積硯

陳留志曰范喬字伯孫年二歲祖父馨臨終執其手曰恨不見汝

成人因以所用硯留與之後家人告喬喬執其硯涕泣御覽五百十九

羅泌路史曰楹書待子積硯貽孫楹書晏子事積硯即范馨也

河圖

雒書靈准聽曰願命曰天球河圖在東序天球寶器也河圖未紀

圖帝王終終始存亡之期

錄圖

河圖挺佐輔曰黃帝修德立義天下大治乃召天老而問焉余夢見兩龍挺白圖以授余於河之都天老曰河出龍圖雖出龜書紀帝錄列聖人之姓號興謀治太平然後鳳凰處之今鳳凰以下三百六十日矣天其授帝圖乎黃帝乃被齋七日至於翠嫫之川大鱸魚折溜而至乃與天老迎之五色畢具魚汎白圖蘭葉朱文以授黃帝名曰錄圖

文苑

鹽法

潛邱劄記曰成化年戶部尚書葉淇言商人輸粟二斗五升是以銀五分得鹽一引也請更其法課輸銀于運司銀四錢支鹽一引可得粟二石是以一引之鹽坐致八倍之利且商人銀納運司道近而便安是上下交利之道奏可於是商人引鹽悉輸銀于運司類解戶部鹽銀歲驟增至百萬餘兩諸商墾田塞下者悉輸撤業歸西北商或徙家于淮以便鹽而邊地為墟粟踊貴石至直五兩時議者屢言虛邊儲而實大倉非計顧歲所增入當數十郡一歲錢穀之數而縣官經費日繁即緩急可以支應慮不能搨目前厚利以深惟邊計欲復如祖宗時書輸粟塞下及薄取八分之利必不可得矣

九宮

王冰元珠密語生稟化源紀篇曰地生坎卦天生一宮地生坤卦天生二宮地生震卦天生三宮地生巽卦天生四宮地生中土天生五宮地生乾卦天生六宮地生兌卦天生七宮地生艮卦天生八宮地生離卦天生九宮九宮配地八卦畫地天九為奇數迺陽

也地八為偶數通陰也即天奇陽生也地耦陰生也即名造化也故陽造而陰化也即名造生化源也故造化二字即陰陽相生也究其本宗則陰陽並生於太初也後來陰陽相生也即陽生陰中陰生陽中也即陽極陰生陰極陽生也

### 土力于乙

春秋元命包曰地者易也言養物懷任交易變化含吐應節故其立字土力於乙者為地藝文

### 石

又曰石之為言託也託立法也

### 元取士

潛邱劄記曰元以科目取士自延祐至元統凡七科而罷至正二年復舉行至二十八年凡九科

### 考察

潛邱劄記曰高文襄曰國初無考察始正統元年嗣是以往亦皆十年一行耳未有一定之題目一定之分嚴處至弘治十七年始令六年一次考察遂迄今今為然然事例有八目四科曰貪曰酷為民曰不謹曰罷軟冠帶間住曰老曰疾致任曰才力不及曰浮躁淺露降調外任法可謂密矣

### 三江

歸子願請治吳湘江松江疏宋時江面原濶九里可敵千浦故與錢唐揚子並稱三江潛邱劄記

### 周夏二公

錢有威曰昔周夏二公治水吳中民初不便詢諸父老父老對曰相公開河功多怨多千載之後功在怨磨二公斷而行之功施到今

上同

天下水勢

邾僑水利書曰臣嘗論天下之水以十分率之自淮而北五分由九河入海書所謂同為逆河入于海是也自淮而南五分由三江入海書所謂三江既入震澤底定是也

治水法詳考工

單錡吳中水利書曰嘗觀考工記善溝者水漱嚙之善防者水淫之蓋謂上水湍流峻急則自然下水泥沙激去矣

水學

屠隆曰昔人之推水學者曰邾亶曰單錡亶詳于治田錡詳于治水兼而用之水政舉矣以上三則皆見潛邱劄記

年頭月尾孤經絕句

唐書楊瑒傳瑒奏有司帖試明經不質大義乃取年頭月尾孤經絕句且今習春秋三家儀禮者纔十二恐諸家廢每日請帖平文以存學家其能通者稍加優官獎孤學從之因詔三家傳儀禮出身者不任散官遂著令生徒為瑒立頌太學門

洪範學

惠子曰箕子為武王陳鴻範福極之理周公作周官設內史八枋之法因鴻範也 小旻之大夫亦傳洪範 五福者考終命則當改元事見漢書哀帝詔惜其說不傳 洪範之學不傳其略見於伏生五行傳余家有藏本為鄭氏注其說頗備乃廿一史五行志之祖也 續漢書天文志曰成帝時中壘校尉劉向廣洪範灾條作五紀皇極之論案國三老袁良碑云灾條備至 後漢許峻有易灾條二卷

無本 玉川 崔立之

昌黎送無本師歸范陽詩狂詞肆滂葩低昂見舒慘姦窮怪變得  
往往造平澹 寄盧仝詩先生結髮憎俗徒閉門不出動一紀又  
云先生抱才終天用宰相未許終不仕假如不在陳力列立言垂  
範亦足恃 贈崔立之評事詩崔侯侯文章苦敏捷高浪駕天輪不  
盡曾從關外來上都隨身卷軸車連軫

孟子節文

應菴隨意錄曰洪武初翰林學士劉三吾奉勅為孟子節文總一  
百七十餘條前有三吾題辭刻在南京國子監此書之外課試不  
以命題科舉不以取士令不見印行何也

東西周辨

吳文正公澂東西周辨戰國策編題首東周次西周近有縉雲鮑  
彪注為西周正統而不應後于東周升之為首卷

高加堰

博湖掌錄曰按三陽縣西南四十里曰高加堰堰不見史而僅見  
郡志為漢建安五年廣陵太守陳登所築余因考三國志注登曾  
任典農校尉乃巡土田之宜盡鑿溉之利益精於水利者當時廣  
陵太守江表傳以為治射陽則此堰尤其密邇為登築復奚疑獨  
怪自建安五年至明永樂平江陳瑄修志時凡一千二百十五六  
年中間並無有人云及高堰者豈湮廢無迹與抑堰止受淮黃尚  
未合而不聞其潰有決之患與及讀宋史楚州司戶參軍李孟傳  
加葺境內徐積墓修復陳公館塘有灌溉之利陳公塘即今高堰  
也堰固不乏修治第史文不備耳同時陳真州東有陳公塘一名  
愛敬波波漕臣錢沖之修復門下李道傳為作記何一時而並舉與

予于此別自有感矣史稱陳元龍才兼文武志在濟民其時吳寇  
壓境盖岌岌矣乃能興屯疆兵保障江淮一南一北水利永賴今  
平江伯既有專祠矣吾以為上當冠以元龍下當嗣以潘季馴為  
三宮合祠盖皆勤于高堰者或亦此地食安瀾之福者所宜動心  
也與

### 師法

前漢書匡衡傳太子大傅蕭望之奏衡經學精習說有師道可觀  
覽 衡上疏匡聞之師曰妃匹之際云云 張禹傳望之奏禹經  
學精習有師法可試事 孔光傳光對日食曰臣聞師曰天右與  
王者云云 魏相傳相明易經有師法 又數表采易陰陽及明  
堂月令奏之 自叙傳班伯誦說有法  
參同契曰若夫至聖不過伏羲始畫八卦效法天地文王帝之宗

法體演文辭夫子睿聖<sup>惟</sup>于翼以輔之三君天所挺迭興更御時  
作事今可法為世定時書素無前識資因師覺悟之

### 家法

後漢順帝紀本初元年令郡國舉朝明年經五十以上七十以下  
詣太學自大將軍至六百石皆遣子受業歲滿課試以高第五人  
補郎中次五人太子舍人又千石六百石四府掾屬三署郎四姓  
小侯先能通經者各隨家法其高第者上名牒當以次賞進<sup>注云</sup>  
為詩者謂之詩家禮者謂之禮 魯丕傳和帝召見諸儒丕與侍中  
家故言各隨家法也 賈逵尚書令黃香等相難數事帝善丕說丕因上疏曰臣聞說經  
者傳先師之言非從已出不得相讓相讓則道不明若規矩權衡  
之不可枉也難者必明其據<sup>據師法</sup>或經傳說者務立其義<sup>義古</sup>浮華無  
用之言不陳於前故精思不勞而道術愈章法異者各令自說師



法博觀其義

鄭桐菴敷教交遊籍

張我城字德仲憲副文奇次子習春秋凡春秋疏義皆其所較刻復廣雅集為文人大觀中歲即持長齋於地方利病賑饑貧造橋修學諸大事一諸生力擔之自朝至暮奔走不遑黃中丞希憲具疏及公名福王時考授金華府倅未就亂後隱居光福山中屏迹力耕以死薛案諧孟武進辛未任至開封守亂後僧裝隱光福山中

紀事

避光福者陸履長坦章拙生美姚文初宗典張德仲我城王貞明節陸銓部康稷案徐昭法枋初避吳江後亦避光福後拙生被縛至殺其一弟一壻貞明遇湖盜劫掠無刺僅以身免文初入山

乃更深俄于五更時擁無賴百人從枕上縛其父子至許墅有陳

都司者頗相逼迫遂申文解撫軍剪其髮而釋之履長披剃為頭

陀銓部堅鍵不出鄭桐菴云張義民預築居光福

曾王父友

金階升字五貞陳性字身之一作升之朱鑑字金兼張我城德

仲陸坦履長章美拙生王節貞明陸康稷薛案諧孟

參同契

都印三餘贅筆曰緯書孝經有援神契則參同契亦易緯書類也緯書之名皆三字

急須僕憎

三餘贅餘曰吳人呼暖酒器為急須呼暖飲食具為僕憎急須以其應急而用吳人謂須為蘇故其音同僕憎以銅為之言僕者不

得竊食故憎之也

硯溪先生論文遺語

詩人賦物有正面有反面反面易寫正面難工如人深情逸態都在若遠若近隔花臨水所謂畫工欲畫無窮處背立東風初破睡者也領得此意方知詩人寫物之工山薑先生常有今人不曉打邊鼓法所以作詩不佳信然

有人喜用古文現存語及摹擬體製成文余謂之曰譬如人食魚肉使下魚肉醫家必謂大病讀古文使鈔古文可不謂之病耶此雖戲言亦有至理

凡為文題緒大棼者必于一字一句挈其要領乃可驅繁馭冗就我繩尺

陳后山代南豐作文僅數百言南豐猶以冗字過多抹去數處每

子

抹處連一兩行后山讀之尤覺首尾完善因歎服遂以為法學者慎毋以文字短長論工拙也

乙卯舉場余與葛東之同為孫公所擯東之幸而復收別駕孟先生語余曰孫公當日以東之卷為小怪子卷為大怪故同考力荐於終不能得余今落魄頹廢不復能怪矣未知東之小怪亦少差<sub>否</sub>也

或語余古文不用倒挈因隨舉太史公天苑傳起句便云天苑之迹見自張騫何嘗不倒挈也

史記長篇之妙千百言如一句由其線索在手舉重若輕也識得此法便目無全耳

古人作詩作文俱不欲過盡過盡則意味無餘

趨庭錄

張空拳而說經此猶燕相之說書也善則善矣而非書意也故聖人信而好古

先君言宋儒可與談心性未可與窮經棟嘗三復斯言以為不朽易之理存乎數舍數則無以為理春秋之義在事與文舍事與文則無以為義

宋儒談心性直接孔孟漢以後皆不能及若經學則斷推兩漢惜乎西漢之學亡矣存者惟毛公一家耳

宋儒經學不惟不及漢且不及唐以其臆說居多而不好古也

書之傳自伏生也保殘守殘缺二十八篇而已梅氏以偽書汨之而漢學涸矣乎胡隨唐諸儒不信鄭學而信偽古文也

左傳不用服虔而用杜預此孔穎達顏師古之無識杜預創短喪之說以媚時君春秋之罪人也

杜預注左傳遠不逮服子慎唯地理勝于服當時有京相

璠撰春秋土地名三卷預資取其說故其書可觀預貴而璠賤故璠書不傳

章句訓詁知也洒掃應對行也二者廢其一非學也

說經無以偽亂真舍河圖洛書先天圖而後可以言易矣舍十六字心傳而後可以言書矣

舍詩小序無以言詩也舍爾疋說文無以言訓詁也

漢人傳易各有源流余嘗撰漢易學七卷其說略備識得漢易源流乃可用漢學解經否則如朱漢之上易傳毛西河之仲氏易鮮不為識者所笑

蔣編修蔣雙迪甫謂先君曰近日吳中四世名山推公家耳蓋數自先明經樸菴公以下也不才如棟亦廁四世之廁列于深愧迪

夫之言

注家之最陋者經傳中無如陳澹之禮記林堯叟之左傳鮑彪之國策今之學者亦知之矣

說經而武斷者二人鄭推胡安國餘無譏焉禮記注引石梁王氏此人尤狂妄文中子晚唐人偽撰也好為大言以欺人有識自知之當為宋人所偽撰耳

漢有經師宋無經師漢儒淺而有本宋儒深而無本有師與無師之異淺者勿輕疑深者勿輕信此後學之責

進士題名

吳楞香名苑太學新立進士題名碑記紀事序進士題名碑舊在太學國朝制科始丙戌碑列大成門左右閏一月探明進士碑計永樂至崇禎凡七十八科王蝕蘇剝僅存三之二太史朱君竹

垞作日下舊聞嘗慨其闕余徘徊既久令吏掘地搜索之首獲宣

德庚戌次獲化成甲辰二碑皆先族祖登第之年同僚咸為撫掌

既而碑盡搜獲惟缺永樂首科一日宮牆傾葦吏詳曰永樂碑得

矣視之果然一代之碑遂全後於啓聖祠土中得元碑三一為正

秦秦國子貢試名記蒙古色目漢人列三榜皆有正副一為至正

十一年進士題名記蒙古色目為一榜狀元朶列圖漢人南人為

一榜狀元文允中皆無榜眼探花一為至正國子中選題名記蒙

古賜正六品色目賜從六品漢人賜正七品亦有正副三碑可徵

一代取士之制豎訖為文三篇恭進御覽復為詩以紀事云詩載

橋門集不工故不載

歲差

翼越集元豫章熊太古撰云古人算曆有歲差之法郭太史守敬言自漢

至今凡七十次差作簡儀以考中星作土圭十五丈長以驗日景  
又以蓋天仰而觀日之所纏皆前代所未有是以授時曆日測月  
驗永終無弊又嘗奏遣使者十四輩分隸十四處於夏至日測景  
長短往往千里差一寸而地之高下水之緩急皆得其而知之都  
去大都千里而近其高四十里於日景而知之也

恒星東轉

禮說云或云日行黃道每歲有差地中當隨而轉移故周在洛邑  
漢在潁川陽城唐在汴州後儀此說非也曆之歲差古法謂黃道  
而移新法謂恒星東轉黃道萬古不變每歲有差者恒星東轉使  
然

劉猛將

居易錄曰舊說江以南無蝗蝻近時始有之俗祀南宋劉漫塘宰

為蝗神劉金壇人有專祠往祀之則蝗不為災俗呼莽將殊為不  
經按趙樞密作漫塘集序稱其學術本伊雒文藝過漢唐不知身  
何以矯誣如此如江湖間祀張睢陽作青面鬼之類也

張天師 嗣師

太真科曰太上告張陵天師曰內外法契與天地水三官析石飲  
丹為誓也張陵受命為天師命弟子扶翼為嗣師上崇虛之堂登  
白虛之壇醮奏太一傳授日訣傳命嗣師承代基業行教天人覽

六百七十九

道學傳曰張裕天師十二世孫居招真觀植名卉盡山迥栖之趣

梁簡文為製碑六百六十六

集仙錄曰張天師道陵隱龍虎山修三元默朝之道得黃帝龍虎  
中丹之術丹成服之能分形散影天師自鄱陽入嵩高隱山得隱

書治命之術六百六十四

道士

太霄經曰人行大道謂之道士又云從道為事故稱也周穆王因尹軌真人<sup>制</sup>刺樓觀遂召幽逸之人置為道士平王東遷洛邑置道士七人漢明帝永平五年置二十人魏武帝為九州置壇三十五人魏文帝幸雍謁陳熾法師置道士五十人晉惠帝度十九人給戶三百六百六十六

正一法

唐書司馬永禎傳永禎事潘師正傳辟穀道引術無不通師正異之曰我得陶隱居正一法逮而四世矣

全真教

全真教紀實曰金主亮貞元元年有吏員咸陽人王中孚者<sup>倡</sup>全

真教談馬丘劉和之其教盛焉章宗泰和四年元學士作紫微觀

記所載詳悉輟耕錄二十九卷

五顯事蹟

羅鶴應菴任隨意錄曰五顯事蹟無從覈實獨胡定菴謂五行主宰之神而盡廢習傳諸說天下祀之者甚多太祖建廟雞鳴隸于太常故紀菴之論以俟考其說曰本朝神祠見會要姓氏皆可攷惟此獨無姓氏何耶升曰莫之為而為者鬼神也周禮小宗伯兆五帝於四郊漢儀祠五祀朝明堂圖五方帝位于昊天之側從之以五人帝五官神皆五行真氣也蓋五行為天地間至大之物必有為之主宰者故曰元囂曰祝融曰句芒曰蓐收曰后土皆指於水火金木土而言若五神豈非默助五行之造化以福生民乎或者以五聖為五通非也本朝政和元年正月詔毀五通

及石將軍妯娌淫祠至宣和五年適有通脫等候之封前後十餘年間黜彼之邪崇此之正昭然甚明尚可得而並論之手亦緣鄉曲前輩偶傳會佛有六通弟子五通之說以啟後人之疑耳迪功國史實錄院編校字文胡升書

蔽易一言

朱豐城曰易為卦六十有四為爻三百六十有四蔽以一言曰時而已此語深有助於易乃自時中之時字來而發前賢所未發也

古人重師道

孔子庚唐子生故臧榮緒用庚子日拜五經朱文公九月十五日生胡安國求是草創明經書院記亦於九月十五日舍菜作書故書此言以明效榮緒之意古人尊師重道如此以上皆羅氏語  
姓同源異為婚

魏氏春秋曰司空東萊王基當世大儒豈不遠禮而納司空王忱女以姓同源異故也御覽五百四十一

鄭樵氏族略曰氏同姓不同者婚姻可通姓同氏不同者婚姻不可通奈何司馬子長劉知幾謂周公為姬旦文王為姬伯乎三代之無此語也潛邱

潛邱劄記曰鄭樵有言氏不同而姓同不足為婚姻若僅氏同如孔子之禮孔出于子孔文之子之孔出于姑鄭有二孔氏出於姬此三孔固可相為婚何者姓不同故說是矣余謂亦有姓同如黃帝之子十二姓有己姓傳至春秋為苦子為郟子祝融之後八姓亦有己姓傳至商末有為蘇氏周初為蘇忿生此二己何妨為婚姻何者以各有其所得之姓不同德故此亦從來論氏族者所未及也

金龍四大王

朱國禎湧幢小品曰金龍大王姓謝名緒晉大傅安裔金兵方熾  
神川戚吮憤不樂任隱居金龍山椒築坐雲亭自娛咸淳中浙大  
中漸天饑損家資飯餒人全活甚眾元兵入臨安擄太后少主去  
義不臣虜赴江死尸僵不壞鄉人義而瘞之祖廟側明太祖兵起  
神示夢當依聖主時傳友德與元左丞李二戰徐州呂梁洪士卒  
見其空中有披甲者來助戰虜大潰遂著靈應永樂間建祠洪上

呂純陽攷

都穆聽雨紀談曰呂洞賓元遺山編唐詩鼓吹中有呂洞賓詩一  
首郝天挺注曰洞賓名嵩京兆人咸通中及第兩調縣令值巢賊  
亂移家婦歸南得道莫測所往則洞賓常任於唐矣予觀洞賓于  
江州望江亭自記曰吾京川人唐末三舉進士不第因游江湖間

年五十道始成及觀洞賓本傳渭謂禮部侍郎父讓終海州刺史  
洞賓始名紹先年二十不從婚娶舉進士滯塲屋者二十三年乃  
罷舉縱遊天下岳陽風土記云洞賓會昌中兩舉進士不第即有  
栖隱之志王舉雅言系述云洞賓咸通中舉進士不第未嘗言及  
第與為縣令也天挺此說豈別有據耶

五通神攷

祝穆方輿勝覽曰五通廟在徽州婺源縣乃祖廟兄弟凡五人本  
姓蕭每歲四月八日來朝禮者四方雲集

七計

關駟十三州記曰上計古之諸侯奏使也漢因號曰計偕計偕次  
第歲入貢於天子郡國豐瑞山川草木萬物無得隱飾應机荅問  
御覽荆南記曰石首縣陽岐山山草無所出不足可書本屬南平



界范玄平記故老相承云胡伯始以本縣境無山北山上計偕簿  
禮記射義云古者天子之制諸侯歲獻貢士於天子注歲獻獻  
國事之書及計偕物也三歲而貢士舊說云大國三人次國二人  
小國一人 何休公羊傳莊元年注云禮諸侯三年一貢士於天  
子天子命與諸侯輔助為政所以通賢共治亦不獨垂尊重民之  
至大國舉三人次國舉二人小國舉一人  
漢書武帝紀元光四年徵吏民有明當時之務習先聖之術者縣  
次續食令與計偕

副啓

觝不觝錄曰尺牘之有副啟也或有所指譏或有所請託不可襍  
他人語不敢具姓名如宋疏之貼黃類耳  
故事投刺通書於東面皆書一正字雖不甚雅亦不知所由來而

承傳已久

京師稱謂極尊者曰老先生自內閣以至大小九卿皆如之門生  
稱座主亦不過曰老先生而已後門生稱座主俱曰老師

九曜齊筆記卷三

典瑞云琢圭以覘聘注鄭司農云琢有圻鄂琢起作圻亦攷工斲

人云良斲環濟注鄭司農云濟讀為瀆酒之瀆墻環謂漆沂鄂如

環疏沂鄂如環者謂漆之文理也郊特牲云丹漆雕幾之美素車

之乘尊其樸也注云幾謂漆飾沂鄂也少儀云國家靡敝則車不

雕幾注云幾時附纏為沂鄂也正義云幾謂沂鄂不雕畫漆飾以

為沂鄂斤與沂皆音魚斤反又作垠御覽五十五淮南子曰今在原上游于霄

霏之野下出于無垠鄂之門今本淮南無鄂字注云无垠鄂無形之視也

今本注云無垠無形狀霄讀又倣真云未有形埒垠又云

通于無圻注云圻垠字也音垠也又作鄭參同契云混沌相交

接權輿樹根基經營養鄣鄂凝神以成軀案圻鄂謂形狀之微起

者故謂之幾琢圭圻鄂者謂琢起圻鄂也良斲環濟者謂漆起形

狀如環者也幾車雕幾圻鄂者謂附纏車之四旁為圻鄂也孔正

義賈疎皆不詳沂鄂二字之義故備及之參同契經營養鄣鄂者

謂兆朕胚胎之義也圻沂鄣皆從金聲故皆魚巾反圻說文垠或

字故高注云圻垠字也說文土部云垠地垠也一曰岸也從土艮聲或作圻從斤

說文玉部琢字下云圭璧上起兆琢也從玉篆省聲周禮琢圭

方勺泊宅編聯句或云起於柏梁非也或武微詩曰胡為乎中露

蓋泥中中露衛之二邑去名劉向以此詩二人所作則一在泥中

一在中露其理或然然則此聯句所起也

聯句

上元張燈

永享宋人搜采異聞錄上元張燈天平御覽所載史記樂書云漢

家祀太一以昏時祠到明今人正月望日夜遊觀燈是其遺事而

今史記無<sup>此</sup>文唐韋述兩京新記曰正月十五日夜初金吾弛禁前後各一日以看燈本朝京師增為五夜俗言錢忠懿納<sup>上</sup>士進錢買兩夜<sup>非</sup>也太平興國五年十月下元京城始張燈如上元之日至淳化元年六月始罷中元下元張燈

鍾離君

南唐縣令鍾離君嫁前令女事見東軒筆錄云余為兒童時嘗聞祖母集慶郡太守陳夫人言江南有國日有縣令鍾離君云云余時尚幼恨不記二令之名

村信

王文正公旦與楊文公億為同門友故公汝州云云余嘗見楊公親筆與公云山栗一稱秤聊表村信蓋汝唯產栗也

日遊神望火

見青箱稊記

山歌

墨莊漫錄云吳人多作山歌聲怨咽如悲聞之使人酸辛

復復

嬾真子唐中興頌云復復指期復復出匡衡傳及何武傳<sup>上音服下音福</sup>

四聲切韻

西溪叢語高氏小史云周顥字彥倫始著四聲切韻行於時

拗句格

野客叢書曰禁齋云魯直有換字對句法如日只今滿坐<sup>且</sup>尊酒後夜此堂空月明日田中不納履坐下適來何處蠅前此未有人作此體自魯直<sup>直</sup>變之茗溪漁隱曰此體出老杜如寵光蕙葉與多碧點綴桃花<sup>舒</sup>小紅者是也今俗語<sup>謂</sup>之拗句格僕謂此體

非出於老杜與杜同時如王摩詰亦多是句如云雨中草色綠堪  
染水上桃花紅欲燃曰勸君更盡一杯酒西出陽關無故人疑亦  
久矣張說詩曰山接夏空險臺留春日遲此亦拗句格也

陳同法議論作文之法

子俞子東陽俞成元德撰慶元時人螢雪叢說云嘗見陳同甫亮在太學議論  
之法經句不全兩史句不全三不用古人句只用古人意若用古  
人語不用古人句能造古人所不到處至於使事而不為事使或  
似使事而不使事或似不使事而使事皆是使事來影帶出題  
意非直使本事也若夫布置開闔首尾該貫曲折關鍵意見常親  
新若方若圓若長若短斷自有成規不可隨他規矩尺寸走也苟  
自得作文三昧又非常法所能盡也

三山老人

宋時詩紀事胡舜陟字汝明自號三山老人績溪人大觀三年進  
士 苕溪漁隱引三山老人語

衍濺

豫章詩話蕭貫少時夢至一宮殿羣女如神仙一人授紙云此行  
波濺煩賦曉寒歌貫援筆立成云云仙曰子詩甚有奇語異日必  
貴貫大中祥符三年進士

鮑信卿蒙古學

太平清話鮑信卿取蒙古及偉兀爾問答比譬之言為書曰選玉  
集及其音韻之所自出字畫之所由通毫釐之間具有分別南北  
人謂蒙古學未有出信卿右者

借書畫

陶宏景借人書隨誤 定未襄陽借書畫親為臨摹題跋印記裝

漢往往亂真後並真贋本同送歸之雖游戲翰墨而雅有隱德

左手

鄭元祐少脫靴任左手號尚左生

官

山谷云陰陽家謂克己者為官既已從任則受制于官不得恣如意也

四川總志

讀天下志以四川總志為第一其金石鼎儀葬秦漢以下之網羅幾盡而立例亦古後序云藝文志悉仍升庵之舊故也

活板

活板自宋慶歷間布衣畢昇始

耕織圖

耕織圖始於宋高宗時於潛令四明樓璣字奇玉見太平清話

十三省號

李文鳳月山叢談書二冊共四卷云天下十三省俗皆有號莫知所始如

陝西曰豹山西曰爪山東曰滕河南曰鱸蘇浙曰鹽豆江南曰臘

雞福建曰癩四川曰鼠湖廣曰乾魚兩廣曰蛇雲貴曰象各以是

相嘲然江西臘雞元時江南之通號不宜獨坐近廖鳴吾戲倫彥

式曰人心不足蛇吞象白山曰天理難容獼猴祭魚蜀舉子張任儼

與余善每見余輒曰委蛇委蛇余應之曰碩鼠碩鼠亦切對也

敬空為批反

袖筆談曰前世風俗者致書於所尊敬尊者但批紙尾答之曰反

故人為之批反如官司批狀右書批答之類故書批多作敬空字

自謂不敢抗敵但空紙尾以待批反耳尊者亦自處不疑不務過

敬前世書啟甚簡亦少用聯幅者後世虛文浸繁無古人款款之情此風極可惜也

尚右

補筆談謂古人尚右見下卷

村學堂

瞿佑歸田詩話曹組元寵題村學堂圖云此老方捫蝨衆雖爭附火想當訓時誨都都平丈我語雖調笑而曲盡村俗之狀近吳敬夫一聯云闌干首蒼先生飯顛倒天吳稚子衣其景况可想也

擊鐘

劉績霏雪錄世以擊鐘為昏曉之警者尚矣通以一百八聲而音節各不同前擊後七擊八中間二十徐徐發更兼臨後擊三聲三通湊成一百八此台州鐘聲節也繫十八慢十八六遍湊成一百八此越州鐘聲節也前三後三中三十三通湊成一百八此杭州鐘聲節也

禁鐘

禁鼓鐘亦有數三通共三千六百九十擊張山門先生云

入閣

劉績霏雪錄入閣之禮案唐故事天子御殿見羣臣日常參朔望薦食諸陵寢有思慕之心不能臨前殿則御便使殿覽見羣臣曰入閣宣政前殿也謂之衙衙有仗紫宸便殿也謂之閣其不御前殿而御紫宸也乃自正衙喚仗由閣門而入百官俟朝于衙者因隨以入見故謂之入閣然衙朝也其禮尊閣宴見也其禮殺自乾符以後因亂禮闕天子不能日見羣臣而見朔望改正衙常日廢仗而朔望入閣有仗其後習見遂以入閣為重至出御前殿猶謂之

入閣其後亦廢至是而復然有司不能講正其事凡羣臣五日一  
入閣見中興殿後唐明宗殿也便殿也此入閣之遺制而謂之起居朔望  
一出御文明殿前殿也反謂之入閣

### 階官

宋朝授官列銜以某階守某官以某階行某官者凡階高官卑則  
稱行階卑官高則稱守官與階同則不必行守二字循唐制也同上

### 二歸

何休公羊隱二年注云婦人生以父母為家嫁以夫為家故謂  
嫁曰歸明有二歸之道

### 竿牘

莊子恬淡之知不離苞苴竿牘司馬曰謂竹簡為書以相問遺修  
意氣也

潛夫論曰百姓廢農桑而趣府廷者非朝晡不得通非意氣不得  
見

### 席上腐談

范蔚宗論貴清淨者以席上為腐議後人取此句以明名書

### 本書

范書孝明八王傳餘七王本書不載母氏注本書謂東觀記也

### 幹吏

晉令諸郡國不滿五千以下置幹吏二人郡國皆有幹幹猶主也

後漢書注

### 中天

後漢劉陶疏伏惟陛下年隆德茂中天稱號注中謂當天之中也

### 張融

毛詩正義有張融案唐書元行沖傳融乃魏博士非六朝之張思光也

年事

北齊邢邵傳邵與濟陰温子昇為文士之冠世論謂之温邢鉅鹿魏收雖天才艷發而年事在二人之後故子昇死後方稱刑魏焉

孟子一則

呂氏春秋曾子曰養有五道修宮室安牀第節飲食養體之道也樹五色施五采列文章養目之道也正六律和五聲雜八音養耳之道也熟五穀烹六畜和煎調養口之道也和顏色悅言語敬進退養志之道也孟子曾元養曾子此所謂養口體者也若曾子則可謂養志也蓋述曾子之言而注孟子者皆不知引

詩一則

小明序曰小明天夫悔任於亂也楊虎疏曰朝無小明之悔蓋用詩序

杜劉唐同姓

春秋傳士會奔秦後歸晉秦人歸其帑其處者為劉氏又范宣子曰昔句之祖自虞以上為陶唐氏在夏為御龍氏在商為豕韋氏在周為唐杜氏是杜唐劉皆同姓也故少陵寄族弟唐十八使君詩云與君陶唐後盛族多其人聖賢冠史籍枝派羅源津又送劉十第判官詩云分源豕韋派別浦鴈賓秋年事推兄忝人才覺弟優

息肅同音

肅慎古作息聖古息肅同音也少陵天邊行曰洪濤滔天風拔木前飛禿鴉後鴻鵠九度附書向洛陽十年骨肉無消息猶從古音



衛莊

少陵赤霄行云皇孫猶曾蓮勺困衛莊見貶傷其足衛莊謂蒯瞶也蒯瞶謚莊公左傳哀十六年衛人出莊公而與晉平十月衛侯自鄆入辛巳石圃因匠氏攻公公闔門而請弗許踰于北方而隊折股正用此事朱鶴林謂衛莊當作鮑莊引鮑牽剛足事恐非皇孫困于蓮勺衛莊攻于匠氏皆為小人所辱事故用之

朝享大廟賦

少陵朝享太廟賦大輅每出或黎元不知見谷永傳又云八音循通又云祝以孝成皆見伏生尚書虞夏傳呂東萊及近注枉者皆不知引

荀子

荀子王霸篇曰身死國亡為天下大謬幾國安于盤石壽于旗翼

注旗讀為翼翼二十八宿名言壽比于星也 處士見非十二

子篇注處士不仕者也易曰或出或處 仲尼篇云仲尼之門人

五尺之豎子言羞稱乎五伯春秋繁露對膠西王仲尼之門人五尺之童子言羞稱五伯為其詐以成

功苟為而已也

繁露

詩無達詒當作易無達言春秋無達辭從變從義

逸周書

淮南子道應訓曰成王問政於尹佚曰吾何德之行佚史而民親其上對曰使之時而教訓之王曰其度安在曰如臨深淵如履薄水王曰懼哉王人乎尹佚曰天地之間四海之內善之則吾畜也不善則吾讎也昔夏商之臣反讎桀紂而臣湯武宿沙之民皆自攻其君而歸神農此世之所明知也如何其無懼也案呂氏春

秋引周書曰若臨深淵若履薄冰又引周書曰民善之則畜也好畜  
也不善之則讎也則尹佚之語當在逸周書

### 金源

金史曰上京路即海古之地金之舊土也國言金曰按出虎以按  
出虎水源如此故名金源建國之號蓋取諸此地理志

### 吏行水上

宋史元祐中王覲加直龍圖閣知蘇州州有狡吏善刺守將意以  
撓權前守用是得譏議覲窮其姦狀寘于法一郡肅然民歌詠其  
政有吏行水上人在鏡中之語

### 生死文字間

張栻曰李仁甫燕如霜松雪柏無嗜好無姬侍不殖產平生生死  
文字間同上李五字出昌黎詩燕傳

### 餐錢

紹興六年修撰范冲言日曆國之大典比詔汪藻纂修事復中止  
宜令就閒復卒前業詔賜史館修撰餐錢聽辟屬編類同上

### 綽楔

凡旌表門閭者于所居安綽楔左右建土臺高一丈二尺方正下  
廣上狹飾白間以赤仍植所宜木同上

### 東西銓

崔瑄以本官判兵部西銓吏部東銓事新唐

### 南北院

遼史百官志凡遼朝官北樞密視兵部以其牙帳居大內南樞密視吏部以其牙帳居大內  
不理民是也南樞密視吏部以其牙帳居大內之南故名南院所謂北衙

### 遼太后語

諺曰偏憐之子不保業難得之婦不主婦

### 風燈石火

耶律和尚曰人生如風燈石火不飲將何為

### 前席

漢書賈誼傳誼為長沙太傅文帝思誼微之至入見上方受釐宣室上因感鬼神事而問鬼神之本誼具道所以然之故至夜半文帝前席既罷曰吾久不見賈生自以為過之今不及也棟案何休注公羊曰禮天子為卿前席大夫興席北當據秦漢禮誼大夫也能明鬼神之本文帝以卿禮禮之故為之前席也顏師古不考前席之義謬為之說云漸促近誼聽說其言詩人李商隱之輩承其訛云可憐夜半虛前席不問蒼生問鬼神夫中庸言鬼神之德其效至贊化育參天地易繫辭曰是故知天地之情狀與鬼神相似宋儒言此

白屬下節非文帝兼問鬼神之本誼具道所以然之故以非鬼神之情狀與天地相似者乎師古謬注之而商隱謬譏之當為有識者所笑耳漢書此傳應邵晉灼諸賢必有注師古刪之而用臆說致令文帝蒙譏後世不可不辨天子為卿前席詩言虛前席甚謬

### 清白

以清白遺子孫北史房彥謙謂子玄齡語

### 人地

劉芳著徐州人地錄二十卷北史

### 影質

徐遵明與劉獻之張吾貴皆何河北聚徒教授頗好聚斂懸納絲粟留衣物以待之名曰影質有損儒者之風

### 樹木僵立

月蝕詩云森森樹木夜僵立漢書匈奴傳或因山巖石木柴僵立落師古曰僵落謂山上樹木摧折或立死枯僵情落者此詩所本也

司製 曲柳

掌衣服裁縫 北史

掌巾櫛膏沐隋時內官也

得句

鄭谷靈臺編靜吟詩騷雅荒涼我自安月和餘雪夜吟寒相門相客應相笑得句勝於得好官

智慧不再來

古樂府秋胡行狀壯威智慧慧殊不再來愛時進趣將以惠誰

貴官

古今樂錄王僧虔技錄云短歌行仰瞻一曲魏氏遺令使節朔奏

樂魏文帝製此辭自撫箏和歌歌者云貴官彈箏貴官即魏文也

中人

子建當牆欲高行人之仕進待中人

錄別

漢紀有李陵錄別詩八首 後人擬蘇李詩

咸陽布衣

怨錄載王子思歸歌楚王子質於秦云洞庭兮木秋滂陽兮草衰去千歲之家國作咸陽之布衣

斷竹

吳越春秋載孝子彈歌云斷竹續竹飛土逐穴 穴今古肉字 劉願  
總曰黃歌斷竹質之至也又曰斷竹黃歌乃 言之始黃帝也

石墨相著

武王書硯曰石墨相著而黑邪心讒言無得汗白

陷文不活

御覽引太公陰謀筆銘曰毫毛茂茂陷水可脫陷文不活

左林右泉

銅盤銘曰武王封比左林右泉前岡後道萬世之靈於焉是保

截趾適履

截趾適履孰云其愚何與斯人追欲喪軀古逸以為鄒衍引古語

惡婦破家

易緯引古語曰躡馬破車惡婦破家

福至心靈

史昭通鑑釋文疏引諺曰福至心靈禍來神昧

楊字

許渾丁卯集冬日登越王臺詩河畔雪飛楊子宅自注楊子漢議

郎楊孚也廣志孚字孝先嘗樹河南五鬣松于廣州北岸粵無雪

至此地雪乃降今下渡頭村前即其故宅

押高字

家君嘗云靈臺編煙含紫禁花期近雪滿長安酒價高元人詩禽

翻竹葉霜初下人立梅花月正高兩押高字皆卓絕

富農

于子漪漬作富農詩刺為富不仁者也其序云堯山南六十里有

倚聲

唐書劉禹錫傳禹錫斥朗州司馬州接夜郎諸夷每祠歌竹枝鼓

吹禹錫倚其聲作竹枝詞十餘篇

綠楊城郭

端已和同年韋學士下途中見寄詩綠楊城郭雨淒淒王新城詞

郭是楊州本此 晉陽秋

高達夫奉酬睢陽李太守詩系高周柱史名重晉陽秋

五天失書

岑嘉州觀楚國寺璋上人寫一切經詩音翻四句偈字譯五天書

條山

中條稱條山見岑嘉州詩五律

磨兜鞞

輟耕錄曰襄州穀城縣城門外道傍石人缺剝腹上有字云磨兜鞞慎勿言是亦金人之流也距縣四五十里有石人二相偶而立腹上題刻一云已及一云未匝不可得而詳也淳休閱目集

漢時明禹貢者使治河

漢書平當傳當以明經禹貢使行河為騎都尉領河堤

子思子

史記平津列傳天下通道五索隱曰案此語出子思子今見禮記

中庸篇

將大出

秦本紀將大出索隱曰出猶生也言爾後嗣繁昌將大生出子孫也

竹南漫錄補二則

余注精華錄初成有妄庸子者竊其書以行于世或問余某氏竊君書幾許余笑曰一一鶴聲飛上天都不存矣

某氏竊余注妄有增益余因作辨訛一卷會稽沈騰友嘉然

嘗笑謂余曰某氏得君書頗亦可觀而自造如此貂裘負籠甚可怪也

### 獄椽通禮

後漢崔瑗傳瑗以事繫東郡發于獄獄椽善為理禮瑗問考訊輒問以禮說

### 律禮相左

卓茂曰律設大法禮順人情二者相左惟聖人能兼而行之苟非然者必有偏廢之憂

士大夫無信

業本無題今就左文補

今之士大夫不如商賈商賈逐什一之利猶以信行于儔類士大夫趣勢利而忘大義無可信之人矣

### 凡目

公羊傳前目而後凡 董子曰號凡而略名詳而目目者偏辨其事也凡者獨舉其事也

### 三等

繁露曰春秋分十二世以為三等有見有聞有傳聞有見三世有聞四世有傳聞五世故哀定昭君子之所見也襄成文宣君子之所聞也僖閔莊桓隱君子之所傳聞也所見六十一年所聞八十五年所傳聞九十六年

### 王霸紀記

司馬法曰王霸之所以治諸侯者六會之以發禁者九案九禁之語鄭康成注周禮引逸禮王霸記云云當是王霸記引周禮之文以釋之司馬法所云王霸乃逸禮篇名也

今司馬法不載釋文蓋非全書

### 役不踰時

杜預注左傳曰古者行役不踰時孔穎達疏穀梁傳曰伐不踰時  
行役聘問亦不踰時也

至孝

繁陽令碑陰有至孝湏愛君威

九曜齋筆記卷四

中表

漢費鳳別碑云中表之恩情兄弟與甥甥與女蘿性樂松之茂  
好蔡琰詩云既至家人盡又復無中外中外即中表儀禮喪服  
總麻章曰  
舅之子馬融曰姑之子為舅之子晉書山濤傳濤與宣穆后有中  
表親是以見景帝十七帖云與足下中表王無異注云舅姑之  
子世說新書曰裴令公楷歲請梁趙二國租錢數百萬以恤中  
表之貧者又曰李元禮有盛名為司隸校尉詣門者皆雋才清稱  
及中表親戚乃通北史盧暕傳中表室婦二卷  
唐志齊元中表傳六卷鄭谷雲臺編有訪表兄王藻渭上別墅詩中  
表人稀離亂後花時莫惜重門相攜魏袁准正論曰或曰同姓  
不相娶何也曰遠別也今之人外內當作相婚禮歟曰中外之親  
近與同姓同姓且猶不可而况中外之親乎古人以為無疑故不制也



今以古之不言因謂之可婚不知禮者也

### 內兄弟

白氏六帖舅子為內兄弟議禮喪服經曰舅之子總晉書阮瞻傳

內兄弟潘岳每令鼓琴鄭氏注曰云內兄弟也傳咸贈何邵王濟序朗陵公何敬祖咸

之從內兄國子祭酒王武子咸從姑之外孫也陸厥有答內兄

顧希叔詩少陵寄簡崔評事十六弟詩開襟仰內弟執熱露白

頭注內弟崔暹赴湖南幕職柳子厚有送內弟盧遵游桂州序注昌黎銘子

厚墓云舅弟盧遵涿郡人李嘉祐臺閣集有送內弟閻伯均歸

江州詩云莫怪臨歧獨垂淚魏舒偏念外家恩嘉祐閻出也

### 妻弟為內弟

閻百詩潛邱劄記云顏真卿家廟碑銘云祖昭甫工篆籀草隸書

與內弟殷仲容齊名而勁利過之父惟貞少孤育舅殷仲容氏蒙

教筆法則亦以妻弟為內弟然而非空同所知

### 外兄弟

喪服經曰姑之子總注云外兄弟也疏云姑是內人以出外而生

故也通鑑宋明帝建武四年王晏外弟阮孝緒注外弟妻弟按

外弟乃姑之子非妻弟陳少章胡注辨記後漢書朱歆傳隗囂將王遵

曰君叔雖單車遠使而陛下之外兄也注光武之子故曰外兄

姨兄弟 姨妹 從母昆弟 從母姊妹

吳書潘濬傳注江表傳曰濬姨兄零陵蔣琬為蜀大將軍又見唐

書崔元暉傳少陵寄狄明府博濟詩梁公曾孫我姨弟十年不

見官濟濟晉書劉羣傳劉琨後溫嶠前後表稱姨弟劉羣內弟崔

悅盧諶等皆在末波中翹首南望喪服通典晉徐衆曰徐思龍

娶姨妹為婦案姨妹從母之女喪服總麻章曰從母昆弟馬融

曰姊妹子相為服 爾雅釋親曰從母之男子為從母昆弟其女子子為從母姊妹

從母 姨母 堂姨 姨夫

爾雅母黨云母之姊妹為從母 素准正論從母時俗所謂姨母者也 姨母見漢書

金日磾傳注又霍光傳光諸女遇太后無禮服虔曰光諸女自以為上官太后為姨母過之無禮 女世說狄仁傑相武后常過盧

氏堂姨請曰某今為相表弟有何欲當力從其意 姨夫見乾饌

子廣記二百四十四卷 即檀弓所謂從母之夫也 禮記檀弓云從母之夫舅

之妻二夫人相為服君子未之言也或曰同爨總鄭注云二夫人

猶言此二人也時有此二人同居死相為服者甥居外家而非之

正義曰云甥居外家而非之者以言從母及舅皆是外甥稱謂之

辭故知甥也謂甥來居在外姓舅氏之家見有此事而非之或云

外家者以二人同住甥居外旁之家遙識之

女孫

漢書陳平傳張負謂其子仲曰吾欲以女孫予陳平又見張安世

傳

從祖姑壻

楓窓小牘余從祖姑壻陳從易得與太清樓校勘

姑夫 姑壻

姑夫二字出國史補宋書袁淑列傳十餘歲為姑夫王弘所賞

小學云近世故家惟晁氏以道申戒子弟皆有法度羣居相呼外

姓尊長必曰某姓第幾妹若兄諸姑尊姑之夫必曰某姓姑夫某

姓尊姑夫未嘗敢呼字也 左傳定五年逐秦過杜注云秦過季

平子姑壻 酉陽雜俎成式姑壻裴元裕

其言父黨文遊必曰  
甘姓幾丈亦未嘗敢  
呼字也

舅母

晉劉臻妻陳氏有荅舅母書蘇文即檀弓所謂舅之妻也

大兄

漢書淮南厲王侍常謂上大兄

女君

喪服經妾為女君傳曰何以期也妾之事女君與婦之事舅姑等  
注女君君適妻也女君於妾無服報之則重降之則嫌

丘嫂

漢書楚元王傳初高祖微時嘗避事時時與過其丘嫂食

孀姑

宋張文潛明道雜錄云經傳中無孀姑二字孀字乃世母二字合  
呼吟姑乃舅母二字合呼也二合如其言中合兩字音為一錄耕

從孫甥

左傳哀二十五年夏大救疾之從孫甥也杜注云云期夏戊之子  
姊妹之孫為從孫甥與甥同列

假母

繼母稱假母見漢書淮南王傳列女傳世說新書王祥事後母  
朱夫人甚謹

妹夫 婦弟 妹婿

北史北齊崔昂後妻鄭元禮姊也魏收又昂之妹夫昂嘗持元禮  
數篇詩示盧思道乃曰看元禮比來詩詠亦當不減魏收思道  
答曰未覺元禮賢於魏收耳知妹夫疏於婦弟 妹婿見趙岐傳  
注 北史劉逖列傳云黃門侍郎王松年妹夫盧士游

先姑

先姑

魯語敬姜曰吾聞之先姑韋昭曰夫之母曰姑沒曰先姑

姊夫 姊壻 姊輩

杜牧之樊川集有奉送中丞姊夫儔自大理卿出鎮江西敘事書

懷十二韻 霍光傳云光姊壻給事中光祿大夫張朔 東觀漢

記曰初王莽時上光與伯叔及姊輩鄧晨穰人蔡少公坐語少公

道誠言劉秀當為天子藝文

姪

公羊莊十九年傳姪者何兄之子也 釋親謂吾姑者吾謂之姪

庶姑 庶叔 外姊

昭二十五年左傳曰季公若之姊為小邾夫人杜注云平子庶姑與

公若同母故曰公若姊正義云公若平子庶叔文曰生宋元夫人

注云宋元夫人  
平子之外姊

表文從叔

黃滔送僧歸北巖寺詩注滔表文從叔有名於當時唐音統籤八百九卷

表姪 表弟 表妹 表叔

少陵有戲寄崔評事表姪蘇五表弟韋大少府諸姪詩 又有送重

表姪王珣評事詩云我之曾祖姑爾之高祖母 唐故江南西道

觀察判官監察御史裏行太原王公墓誌銘表姪前諸道轉運推

官將仕郎試大理寺評事許志雍撰見陶宗儀古刻叢鈔表妹見唐書李

密傳 胡一桂啟蒙翼傳曰明道先生行狀云神宗嘗使心推擇

人才所薦父表弟張載及弟頤為首案此橫渠程夫子表非也

朱子韓溪翁程君墓表無祖母君之姑固謂君叔父子未兄云父之表叔謂之

重表叔未詳出何書

中外孫

世說新書張玄之顧敷是顧和中外孫猶今之表姪孫也

先後 婦如訓

爾雅釋親曰長婦謂穉婦為娣婦婦謂長婦為似婦注云今相呼先後或云妯娌 史記封禪書云神君者長陵女子以子死見神於先後宛若孟康曰兄弟妻相謂先後索隱曰今妯娌也鄒誕音二字並去聲 韋昭曰先謂如後謂娣也宛音寬 隋書經籍志馮少胄娣如訓一卷 尚書大傳孔子曰自吾得師曰前有光後有暉是先後耶此可借用 沈休文集前暉後光 喪服小功章曰夫之姑姊妹娣似婦報傳曰娣似婦者弟長也弟後也長先 以後一曰以年則弟注云娣似婦者兄弟之妻相名也 以兄則長故曰弟長

家君

世說新書客有問陳季方足下家君太邱有何功德而荷天下重名此邦人稱太守見漢碑及世說新書

女君

喪服期者不杖章曰妾為女君傳曰何以期也妾之事女君與婦之事舅姑等鄭注云女君之適妻也女君於妾無服報之則重降之則嫌

先臣

春秋昭元年左傳晏子曰臣之先臣容焉 臣對君稱父為先臣

天父

天父祖父見張良傳又馮唐傳其天父趙人

祖姑三人

喪服小記曰婦祔於祖姑祖姑有三人則祔於親者陳注三人有繼也親者

謂舅所生也 繼者皆稱祖姑之證

君母 嫡母 少母

喪服小功章云君母之父母注云君母父之適妻也 王肅曰君母庶子之嫡母 案馬融以為母之所君故曰君母出母謂庶子賤

故稱嫡母為君母 朱子司農丞翁君墓碣銘調明州司理參軍

以母喪不赴主管吏部架閣文字又以少母喪去官 王止仲曰

所謂少母蓋其生母也

母之君母

喪服小記曰為母之君母母卒則不服母庶而稱外祖母為母之君母 陳注母之

君母母之適母也

從祖父母

喪服小功章曰從祖祖父母報從祖父母報鄭注云祖父之昆母

之親

族曾祖父母 族祖父母 族父母 族昆弟

喪服總服章曰族曾祖父母族祖父母族父母族昆弟注云族曾

祖父母者曾祖昆弟之親也族祖父者亦高祖之孫則高祖有服

明矣 賈疏云族父母者己之父從祖昆弟也族昆弟者己之三

從兄弟皆名為族

祖庶母

喪服小記曰為慈母後者為庶母可也為祖庶母可也父之所生為祖庶母

長孫 中孫

長孫中仲孫見王莽傳

繼室

左傳隱元年繼室以聲子生隱公

外舅 外姑 婦翁

妻之父母為外舅外姑見爾疋 婦翁見第五倫傳

庶孫婦

喪服總麻章曰庶孫之婦馬融曰祖父母為嫡孫之婦小功庶孫婦降一等故服總

堂兄弟 再從兄 三從兄 從父兄弟

杜牧之有為堂兄慤求澧州啟禮世說賞譽篇曰羊長和父繇與太傅祜同堂相善繇蚤卒祜來哭見長和哀容舉止宛若成人迺嘆曰從兄不亡矣又規箴篇注云桓氏譜曰道恭字祖猷葬同堂弟也 開元禮曰成人九月為從父兄弟注云今之同堂兄弟後漢書楊震傳震上疏曰伏見詔書封故朝陽侯劉護再從兄瓌襲護爵為侯 唐薛君塔銘後稱再從兄鈞撰 酉陽雜俎云成

式三從兄云云 開元禮云總麻三月為族兄弟注云三從兄弟三從姊妹 漢書曰荆王劉賈高帝從父兄也師古曰父之兄弟之子為從父兄弟也言本同祖從父而別 爾疋釋親曰父之兄弟之子弟之子相謂為從父兄弟 喪服大功章云皆為其從父昆弟之為大夫者

三從父 從父子 從父昆弟姊妹

唐書盧僕吏部尚書從願三從父也郭欽說 酉陽雜俎曰成式

三從房叔父某自信安至洛 漢書夏侯勝傳從父子建師古曰從父昆弟之子 喪服小功章曰從父姊妹注云父之昆弟之女 從祖昆弟

漢書燕王劉澤高祖從祖昆弟也師古曰言同曾祖從祖而別也 喪服小功章曰從祖昆弟注云父之從父昆弟之子馬融曰謂

曾祖孫也於已為再從昆弟同出曾祖故言從祖昆弟  
從母

顏氏家訓曰陸機集有與長沙顧母書乃其從叔母也今所不行  
阿兄

世說新書謝奕作剡令有一老翁犯法謝以醇酒罰乃至過醉  
而猶未已大傅時年七八歲著青布袴在兄鄰邊坐諫曰阿兄老  
翁可念何可作此

女壻 長女壻 孫壻 中女壻  
俱見霍光傳 又女壻三國志屢見

兩姨兄弟姊妹

開元禮云總麻三月為從母兄弟姊妹注云今謂兩儀兄弟姊妹  
曾孫

鄭曉古言曰自孫之子而下事先祖皆稱曾孫曾者重也

來孫昆孫 仍孫 雲孫

釋名曰元孫之子曰來孫此在無福服之外其意疏遠呼之乃來  
也來孫之子曰昆孫昆實也恩情轉遠以禮貫連之耳昆孫之子  
曰仍孫以禮仍有之耳恩意實遠也仍孫之子曰雲孫言去已遠  
如浮雲也

明非女君而此婦尊之與女君同故云皇姑也

妾祖姑

禮記曰妾祔於妾祖姑喪服小記同

同胞 弟兄

東方朔客難曰同胞之徒無所容居蘇林曰胞音胞胎之胞也言  
親兄弟 白虎通曰謂之兄弟者何兄者况也况父法也弟者悌



曾祖孫也於己為再從昆弟同出曾祖故言從祖昆弟

從母

顏氏家訓曰陸機集有與長沙顧母書乃其從叔母也今所不行

阿兄

世說新書謝奕作剡令有一老翁犯法謝以醇酒罰乃至過醉而猶未已大傅時年七八歲著青布袴在兄鄰邊坐諫曰阿兄老翁可念何可作此

女壻 長女壻 孫壻 中女壻

俱見霍光傳 又女壻三國志屢見

兩姨兄弟姊妹

開元禮云總麻三月為從母兄弟姊妹注云今謂兩儀兄弟姊妹姨曾孫

鄭曉古言曰自孫之子而下事先祖皆稱曾孫曾者重也

同父少弟

漢書曰楚元王交字游高祖同父少弟也師古曰言同父知其異母皇姑

服問曰傳曰有從輕而重公子之妻為其皇姑庶子之妻稱庶子所生曰皇姑疏云皇姑君也此妾既賤若惟云姑則有嫡女君之姑今加皇字明非女君而此婦尊之與女君同故云皇姑也

妾皇姑

雜記曰妾祔於妾皇姑喪服小記同

同胞 弟兄

東方朔客難曰同胞之徒無所容居蘇林曰胞音胞胎之胞也言親兄弟 白虎通曰謂之兄弟者何兄者况也况父法也弟者悌

也心順行篤也 公羊傳曰母弟稱弟母兄稱兄何休曰母兄同母兄

荒

劉熙釋名曰兄荒也荒大也故青徐人謂兄為荒也

次兄

世說新書注續晉陽秋曰謝朗字長度安次兄據之長子

先女君 攝女君

禮記曰女君死則妾為女君之黨服攝女君則不為先女君之黨服妾不敢為夫人故稱攝女君 陳注妾攝女君則不服以攝位稍尊也

君舅君姑

爾足釋親曰姑舅在則曰君舅君姑沒則曰先舅先姑注國語曰吾聞之先姑

威姑

說文引漢律曰婦告威姑家君曰威姑猶君姑也古威君同音

少姑 兄公 女公 女妹

爾足釋親曰婦謂夫之庶母為少姑夫之兄為兄公注今俗呼兄鍾語之轉耳公釋文作妘云音鍾本今作公 又曰夫之弟為叔父夫之姊為女公夫之女弟為女妹

兄伯

婦人呼夫之兄為伯於書無所載予頃使金國時辟景孫弟輔行弟婦在家許齋醮及還賽願予為作青詞云頃因兄伯出使夫壻從行雖借陳平傅兄伯之語而自不以為然偶憶爾雅釋親篇曰婦稱夫之兄為兄公於是改兄伯為兄公 永亨搜採異聞錄

舅姑

白虎通曰稱夫之父母謂之舅姑何尊如父而非父者舅也親如母而非母者姑也故稱夫之父母為舅姑也

兄子 兄女

世說新書謝太傅安寒雪日內集與兒女講論文義俄而雪驟公欣然曰白雪紛紛何所似兄子胡兒曰撒鹽空中差可擬未若柳絮因風起

舅父 君母昆弟 舅母

史記索隱曰漢表鄔侯駟鈞鄔太原齊縣齊哀王舅父侯舅父即舅猶姨曰姨母然也 喪服總麻章曰君母之昆弟 案君母昆弟即舅也總麻章有舅又有君母昆弟嫡子稱舅庶子賤稱君母昆弟 劉孝標世說新書注魏書明帝於園為象母起觀名其里曰渭陽象母即帝之舅母

髻舅

東坡送王元直之詩空使犀顱玉頰注先生之子長懷髻舅淒然

婚姻 異姓 兄弟 連

爾疋婚姻曰壻之父為姻婦之父為婚婦之父母壻之父母相謂為婚姻婦之黨為婚兄弟壻之黨為姻兄弟注云古者皆謂婚姻為兄弟 白虎通曰婚姻者何謂也昏時行禮故謂之昏也婦人因夫而成故曰姻詩云不惟舊因謂夫也又曰燕爾新昏謂婦也

家語弟子行曰獨居思仁公言言義其於詩也則一日三復白圭之玷是宮韜之行也孔子信其能仁以為異士王肅曰大戴引之曰以為異姓婚姻也以兄之女妻之者也 國語云先王聘后於異姓 周禮司儀職時揖異姓 公羊僖廿五年宋蕩伯姬來逆婦傳云其言來逆婦何兄弟辭也何休曰宋魯之間名結婚姻

為兄弟 宣十年穀梁傳齊人歸濟西田公娶齊繇以為兄弟  
友之疏引爾疋 漢書音義曰連親姻也

本生父

儀禮喪服齊衰不杖章曰為人後者為其父母報宋孝宗人傳  
之子也高宗封為秀王稱曰太子本生父本生父者猶曰視其父  
云耳

從祖姑 族祖姑 從祖姊妹

爾疋釋親曰父之從父姊妹為從祖姑父之從祖姊妹為族祖姑  
喪服總麻章曰從祖姑姊妹適人者報馬融曰從祖姑姊妹於  
已再從在室皆小功適人絳降一等故總

王姑

爾疋釋親曰王父之姊妹曰王姑 喪服總麻章父之姑注云婦

孫謂為祖父之姊妹

先人

詩小宛云念昔先人 襄公二十三年左傳杞梁妻曰猶有先人之  
敝廬在謂殖之先 世說新書桓帝侍常羹聞人道深公者輒曰  
此公既有宿名加先達知稱又與先人至交不宜說之

離孫 歸孫 彌孫

爾雅釋親曰男子謂姊妹之子為出女子為謂弟之子為姪謂出  
之子為離孫謂姪之子為歸孫 離孫今謂彌孫本哀二十三年  
宋景曹卒季康子使冉有弔曰以肥之得備彌孫也杜注彌遠也  
康子父之舅氏故稱彌孫 又稱從孫甥見左傳哀二十五年傳

從姪

唐寧遠將軍李宗卿墓誌銘稱從姪鄉貢進士藝通撰

從祖昆弟之子

喪服總麻章曰從祖昆弟之子注云族父母為之服再從兄弟之子

弟子

世說新書鄧攸始避難於道中棄己子全弟子

外生

世說新書郝公鑿值永嘉喪亂在鄉里甚窮餒攜兄子邁及外生周翼二小兒往食

内大父

漁洋集稱妻之祖為内大父未知所出 顏魯公家廟碑以妻弟為内弟見前妻弟可稱内弟則妻之祖可稱内大父矣

婦兄 婦弟

王莽傳王守婦兄呂寬守莽子婦弟出北史見上

外王父 外祖 外祖母

何休公羊注曰禮外孫初冠有朝外祖之道 唐書蔣乂外祖吳兢幼從外家學得其書西齊集引 世說新書魏明帝為外祖母築館于甄氏謂左右曰館當何以為名侍中繆襲曰宜以滑陽為名

外孫

郭解温善相人許負外孫也 喪服總麻章曰外孫注云女子子之子

外家牽連之親

楊子雲答劉歆書曰臨邛林閭翁孺與雄外家牽連之親

瓜葛

續漢書禮儀志注謝承書曰明帝嗣位帥公卿百寮就園陵而朝

馬荀先帝有瓜葛之親男女畢會 世說排調篇云王長豫幼便  
和令丞相愛恣甚篤每共圍碁丞相欲舉行長豫按指不聽丞相  
笑曰詎得爾相與似有瓜葛注蔡邕曰瓜葛疏親也 蔡邕  
獨斷

### 苗裔 皇

離騷經曰帝高陽之苗裔王逸注曰苗胤也裔末也 又曰皇覽  
揆余于初度兮注云皇皇考也

### 皇考

離騷經朕皇考曰伯庸王逸注云皇美也父死稱考詩曰既右烈  
考

高祖王父王母 曾祖王父王母 王父 王母

爾疋曰釋親曰父之考曰王父父之妣曰王母云云 哀二年公  
羊傳曰不以父命辭王父命

### 血脉

何休公羊注 年 莊元 云同姓有血脉之屬

### 從孫

周語曰共之從孫四岳佐之韋昭注共共工也從孫昆弟之孫也  
君公

綠水亭禱識宋有嫁子者云云其子竊而藏之君公知其盜也逐  
而去之君公其舅之稱故婦人謂夫之兄曰兄公

### 結髮

蘇武詩結髮為夫妻恩愛兩不疑 又見國三老袁良碑

### 女姑女叔

昏義曰婦順者順於舅姑和於室人而后當於夫注云室人謂女  
姑女叔諸婦也疏云室人是在室之人非男子也女姑謂壻之孀

姊也女叔謂壻之妹諸婦謂弟如之屬 何休公羊注曰禮婦人見舅姑以棗栗為贄見女姑以脰脩為贄

繼姑

漢李翊夫人碑曰繼姑入室勤養縵：

從舅

爾疋釋親母之昆弟為舅母之從父昆弟為從舅

君 男君

喪服斬衰章曰妾為君傳曰君至尊也鄭注云妾謂夫為君者不得體之加尊之也雖士亦然疏云士言爭友則屬隸不得為臣則士身不合名君至於妾之尊夫與臣無異是以雖士妾得稱夫為君也 釋名曰妾謂夫之嫡妻曰女君夫為男君故名其妻曰女君也

壻

公羊傳曰若君贅旒然何休曰旒旒贅繫屬之辭若今俗名就壻為贅壻矣疏云亦是妻所持繫故名之云爾 徐廣史記註曰男無聘財以身自質於妻曰贅 索隱曰壻如人身之疣贅是餘刺之物

友壻

釋名曰兩壻相謂曰友壻言相親友也 漢書嚴助傳助對曰家貧為友壻富人所辱師古曰友壻同門之壻

即今妻姊之夫

子姪

世說新書謝公曰賢聖去人其間未遠子姪未之許

表生女

杜樊川集尚書吏部侍郎沈公郊行狀曰我烈祖司徒岐公與公

先少保友若善一見公喜曰沈氏有子吾恨矣無因以馮氏表生女妻之

外甥

唐故穎川郡陳府君墓誌銘 外甥隴西李藝集

親家

魚豢魏略曰趙熹字伯陽為平原太守百官大會光武問熹在郡何如咸稱熹政有跡詩時親家諸夫人皆會會罷諸夫人言熹篤義多恩從長安還護妾等衣食生活使得蒙今日之富貴非獨能驅人也

御覽四百七十六

二門公

世說新書謝景重女適王孝伯兒二門公甚相愛美 二門公猶俗言兩親家也

陳氏沈 下同

杜東原瓊書禮札後云右禮書一通乃先姑夫陳孟彬之母遺吾先祖母者世所謂道日書也其詞翰為鄉先生卞孟符所作藏之篋笥已六十餘年昨者檢出因志其自婦人書疏云史不詳載惟楊太尉夫人通書曹操夫人稱彪袁氏頓首王逸少字師衛夫人乃李太守之妻其妻亦稱李氏衛再拜豈可以禮經諱不出門左氏傳中婦人以夫姓為姓而以己姓為名之例也歟今書中稱陳氏沈者蓋援是例也事不師古即為杜撰先生讀書博學豈肯為杜撰者哉如世俗稱歸某郡某氏某奉書則無出矣先生諱同孟符字也別號萍軒任至都昌令河南郡守周府左長史以疾終于官平生畏慎有守世稱德人觀其言辭之腆贍心畫之端莊可以驗其為人矣



姑姊 姑妹

左氏襄十二年傳姑姊妹正義曰釋親曰父之姊妹曰姑樊光曰春秋傳云姑姊妹然則古人謂姑為姑姊妹若父之姊為姑姊父之妹為姑妹列女傳梁有節姑妹入火而救兄救宋本子作取其是謂父妹為姑妹也後人從省故單稱為姑也古人稱祖父近世單稱祖亦此類也

內叔

漁洋集有石龜行為內叔長白山人賦內叔謂妻之從父也

叔翁 叔婆

昌黎祭李氏二十九娘子文云惟年月日十八叔翁及十八叔婆盧氏遣祖以庶羞之奠祭于李氏二十九娘子之靈云云注云公之姪孫女李

妻干

叔郎

任昉奏彈劉整公云故西陽內史劉寅妻范詣臺訴列稱出適劉氏二十許年劉氏喪亡撫養孤弱叔郎整常欲傷害侵奪

姪孫

唐徐氏山口碣石題刻稱姪孫璟檢校

孝子 孝孫 哀子 哀孫 謝孝

禮記曰祭稱孝子孝孫祭吉喪稱哀子哀孫祭凶世說新書謝鎮西

鎮西陸本玄在安西艱中安西謝林道人往就語將夕乃還退有人

道上見者問云公何處來荅云今日與謝孝劇談一出來

高祖

書疑禮稱曾祖之父為高祖左傳昭十七年鄭子曰我高祖少皞摯則以始祖為高祖昭十五年景王謂藉談曰昔而高祖孫伯麇

則謂九世祖為高祖

世父 仲父 妯父 孝父

釋名曰父之兄曰世父言為嫡統繼世也又曰伯父伯把也把持家政也父之弟曰仲父仲平也位在中也仲父之弟曰叔父叔少也叔父之弟曰季父季癸也甲乙之次第癸最在下季亦然也者也 世母見喪大記 世母見禫記

喪父

漢書楚元王傳我起先取季父矣

賢家君 老父

世說新書陳元方年十一候袁公袁公問曰賢家君在太邱遠近稱之何所履行元方曰老父在太邱疆者綏之以德弱者撫之以仁恣其所安久而益敬

家嫂

世說新書謝公語同坐曰家嫂解情慷慨致可傳述 安次兄據取太康王韜女名綏

猶子 子姪 姪男 父子 從子 族子 子姪

儀禮喪服傳曰兄弟之子猶子也 晉書王湛傳云濟才氣抗邁於湛略無子姪之敬 顏元孫干祿字書顏真卿書序稱第十三姪男真卿書 柳宗元祭六伯母文亦自稱姪男 顧炎武案顏氏家訓曰兄弟之子北王多呼為姪案爾雅喪服經左傳姪名雖通男女並是對姑之稱晉世以來始呼叔姪書姪而又加男此唐人之俗稱也 又云古者兄弟之子皆曰子漢書疏廣與其兄子受父母子並為師傅後漢書蔡邕與其叔父質得罪上書自陳亦曰言事欲陷臣父子晉書謝安傳安與兄子玄父子皆著大勳

則謂九世祖為高祖

伯父叔父 世母 世父

潛邱劄記曰西漢曰古者卿大夫五十不稱字別以伯仲天子稱同姓曰伯父叔父是稱也達於天子下若去父止稱伯叔則是以長幼為次序而以父之兄弟同於凡人之稱矣此後人失禮之甚者也 世母見喪大記 世母見禮記

喪

漢書楚元王傳我起先取李父矣

賢家君 老父

世說新書陳元方年十一時候袁公袁公問曰賢家君在太邱遠近稱之何所履行元方曰老父在太邱疆者綏之以德弱者撫之以仁恣其所安久而益敬

家嫂

世說新書謝公語同坐曰家嫂解情慷慨致可傳述 安次兄據取太康王韜女名綏

猶子 子姪 姪男 父子 從子 族子 子姪

儀禮喪服傳曰兄弟之子猶子也 晉書王湛傳云濟才氣抗邁

於湛略無子姪之敬 顏元孫干祿字書顏真卿書序稱第十三

姪男真卿書 柳宗元祭六伯母文亦自稱姪男 顧炎武案

顏氏家訓曰兄弟之子北王多呼為姪案爾雅喪服經左傳姪名

雖通男女並是對姑之稱晉世以來始呼叔姪書姪而又加男此

唐人之俗稱也 又云古者兄弟之子皆曰子漢書疏廣與其兄

子受父母子並為師傳傳後漢書蔡邕與其叔父質得罪上書自陳

亦曰言事欲陷臣父子晉書謝安傳安與兄子玄父子皆著大勳

世說江左殷太常父子亦謂殷容融與其兄子誥今人謂兄弟之  
大夫子亦曰姪非也 朱子語類姪字本非兄弟之子所當稱當  
稱從子為是自曾祖而下三代稱從子高祖四世而上稱族子  
史記武安侯傳往來侍酒魏其跪起如子姪顧炎武曰當時未有  
稱姪者漢書作子姓禮記喪大記注子姓謂眾子孫也列子秦穆  
公謂伯樂曰子姓有可使求馬者乎史記外戚世家既驩合契會  
矣或不能成子姓

宗兄 宗弟 宗子

宗兄宗弟雁行也宗子尊卑通稱也見曾子問皆同宗昌黎考功  
貧外郎盧君墓銘云愈之宗兄故起居舍人君以道德文學服一  
世註宗兄謂韓會撫言以為韓衢

七族

漢書注張晏云七族上至曾祖下至元孫 史記索隱七族一說  
父之族也姑之族子二也姊妹之子三也姊妹女子之子四也母之族  
五也從子六也及妻父母凡七  
父友

喪大記既葬若大夫父之友食之則食之矣不辟梁肉若有謂醴  
則辭 陳注父友父同志者

朋友世親 世講 世契

潛夫論曰語曰人惟舊器惟新昆弟世疎朋友世親此交際之禮  
人之情也 呂氏童蒙訓曰同僚之契交承之分有兄弟之義至  
其子孫亦世講之前輩專以此為務今人知之者蓋少矣交承新舊官交  
也 唐詩紀事杜甫與嚴武世契也嘗醉登武林呼斥其父名而  
武不忤